

WANTOK

NIUSPEPA BILONG YUMI OL PAPUA NIUGINI STRETI 30 YIA NAU

32 pes

Namba 1,345

Wik i stat long Fonde Epril 6, 2000

70t

**I
N
S
A
I
T**
**Ol ripot
long palamen**


pes 2 na 3

**Turis oips kros long
Kalakai maket**

pes 7

**Stori bilong biknem
Is Timor lida**

pes 21



• Ol Nu Silan soldia long Bogenvil i mekim Maori danis bilong ol las wik taim ol Bogenvil lida i opim Bogenvil provinsel gavman.

Gavman i yusim bikpela mani bilong NPF

YAKAM KELO i raitim

BIKPELA mani bilong Nesenel Providen Fan (NPF) i lus long han bilong nesenel gavman bikos ol i bin kisim olsem dinau long mekim ol wok na kirapim ol projek insait long kantri.

Wok painimaut bilong KPMG akaunting kampani i sekim ol rekot na buk bilong NPF na painimaut olsem politiks i putim han bilong ol igo insait long mani bilong NPF na kisim mani mak olsem K100 milien long mekim ol wok bilong em wan-taim.

Dispela ripot i tok politiks i nogat pawa long kisim mani bilong NPF long mekim ol wok projek na tu yusim mani bilong NPF olsem sekyuriti long kisim dinau long ol beng. Lo bilong NPF i tambu long dispela tasol bod menesmen bilong NPF i sakim dispela lo na go het long rausim mani bilong NPF. Bikpela mani bilong NPF i bin lus long olpela menesmen long 1996 i kam inap long 1999 las yia taim nupela menesmen i tekova.

Bikpela yunion bodi bilong ol wok-manmeri long ol praiwet kampani na bisnis, PNG Tred Yunien Kongres i

tokaut olsem bai olgeta NPF membas i holim straik i go long haus palamen long dispela wik long soim bel kros bilong ol long gavman.

Jenerel Seketeri bilong PNGTUC John Paska i tokaut olsem ol i salim pas i go pinis long Praim Minista Sir Mekere Morauta long tokim ol long wanem eksen gavman bai mekim long dispela hevi. Tasol Mista Paska i tok maski sapos Praim Minista i no bekim wanpela toktok long pas bilong PNGTUC, ol wokmanmeri bai straik yet.

Planti manmeri i bin ring long telefon long askim ol menesmen bilong NPF taim ol i bin go toktok long redio program. Na planti i askim sapos NPF i katim hap mani bilong ol bai NPF i bekim bek long bihain o nogat. Tasol menesa bilong NPF Rod Mitchel i tok bai i no inap isi. Dispela hap mani bilong ol memba bai lus. Tasol sapos NPF i wokim mani long bihain wantaim win mani, ol bai lukim dispela olsem bonus.

Bikpela mani bilong NPF em gavman i bin kisim long ol wok olsem Poreforena Friwe long Mosbi K64 milien, Eda Ranu K6 milien, Deloitte tawa long Mosbi K60 milien na sam-

pela mani i go long Nikel Kobal maining long Ramu, wanpela hotel long Indonesia na arapela moa.

Emplois Federesen i tokaut olsem sapos wanem lain i bin asua long bagarapim mani bilong ol pipel long NPF i go long kot, dispela bai i no inap long helpim long stretim bikpela hevi nau i kamap pinis. Olsem na long nau yet, ol emplois federesen i laikim bai ol kampani i noken baim NPF mani bilong ol i go long NPF yet inap olgeta hevi i go orait. Bikpela tingting nau em long lusim NPF na statim narapela opis we i ken lukautim gut seving bilong ol wokman.

Menesa bilong NPF Rod Mitchel i tokaut olsem sapos gavman i kam insait long stretim dispela hevi bilong NPF bai ol samting i orait.

Mista Mitchel i tok tu olsem NPF i taitim ol lo bilong em long stapim ol han bilong politiks long i no ken go insait long wok bilong NPF na tasim mani bilong ol. Bikos gavman i nogat wanpela nem insait long wok bilong NPF. Na i no stret tru long gavman i tasim mani bilong ol ausait lain. Dispela senis bilong NPF lo i stap yet wantaim gavman long toktok na mekim i kamap lo.

Gavman apim takis long smok na spirit

WENCESLAUS MAGUN i raitim

GAVMAN pasim takis lo long palamen dispela wik bilong apim takis long ol spirit o ol strongpela dring olsem OP, Wiskey, Vodka na ol arapela i go antap long 200 pesen (%). Bipo i bin 150%. Dispela bai bringim takis i go antap long 33.3%. K2. bai igo antap long prais bilong olgeta strongpela dring nau.

Long wankain taim palamen i bin pasim dispela bil long apim 160% takis long ol sigaret smok i go antap long 240%. Prais bilong wanpela bikpela paket smok bai olsem K6.

Takis bilong ol smok tobako na trade twist tobako bai lusim 26% na i go antap long 40%. Dispela bai bringim takis i go antap long 54 %n senis.

Ol arapela tobako na 'Snuff na Chewing' takis bai lusim 73 % na i go antap long 150 %n. Dispela bai bringim takis i go antap long 105% senis.

Praim Minista na minista bilong Fainens na Tresi, Sir Mekere Morauta i tok dispela senis bilong ol takis bai kisim samting olsem K10 milien i kam insait long Gavman olsem ekstra mani long ol mun bihain long dispela yia.

Palamen i pasin tu sampela senis insait long 'Geming Masin Bil 2000' o lo bilong ol poka masin we i toktok long pasin bilong skelim ol profit bisnis bilong poka masin i save mekim.

Insait long dispela bil palamen i

tok orait long senisim 60% na putim i go daun long 55%.

Palamen i go het na pasim bilong mekim sampela senis insait long 'Bookmaking (Amendment) Act 2000 na putim i go long 4%.

Planti ol memba long palamen i bin sapotim tru dispela ol senis long wanem ol i tok pasin bilong pilai hos, pokis, smok na dringim ol strongpela dring i wok long bagarapim tru sindaun bilong wanwan manmeri na pikinini, famili, komyuniti, provins na kantri olgeta.

Praim Minista Sir Mekere i tok takis bilong alkohol na tobako long PNG em i aninit long wol standet. Em i tok long planti ol bikpela kantri, ol i apim tru prais bilong ol dispela samting.

Em i tok taim prais bilong alkohol na smok i daunbil, dispela i sigirapim bel bilong planti pipel long dring spirit na smok.

Sir Mekere i tok dispela kain pasin i save kamapim planti lo na oda hevi na tu putim helt na laip bilong ol pipel husat i save smok na dring long mak bilong dai.

Memba bilong Mosbi Saut, Carol Kidu i tok i gutpela long gavman i yusim win mani bilong smok na alkohol long kirapim ol rihabilitesen senta na ol arapela sosel sevis we i ken skulim ol pipel long lukim birua bilong smok, pilai hos, pokis, na dring ol strongpela dring i save kamapim.

Em i tok i no gutpela long Gavman i yusim dispela eskus long mekim mani na i no putim mani long ples em i toktok long en.

Nestlé MILO IKEN WOKIM GUTPELA SAMTING LONG YU

Palamen ripot wantaim WENCESLAUS MAGUN

Palamen pasim Banks na Financial Institutions lo

PLANTI memba i tok orait long Gavman i ken go het na senisim sampela ol lo i stap insait long 'Banks na Financial Institution Bill 2000' (BFIA) aste taim Prain Ministra Sir Mekere Morauta i ritim.

Sir Mekere i tok astingting bilong senisim sampela ol lo i stap insait long dispela 'Bill' em bilong helpim na strongim ol regulesen bilong ol beng, ol fainensel institusen, ol beng holding kampani, na helpim ol long stapim ol lain i gat laik long statim ol 'pyramid' skim.

Em i tok dispela ol senis bai givim BFIA pawa long salim i go aut long Beng bilong Papua Niugini (BPNG) moa regulatori na supavaisa pawa.

Sir Mekere i tok dispela ol senis i bihainim tingting bilong bringim PNG long lain wantaim ol intanesenel stendet bilong ol fainensel sekta supavisen we ol 'Basel Committee of Banking Supervisors' i kamapim.

Em i tok dispela bai opim rot bilong kamapim gutpela maket bilong mani na gutpela pasin bilong supavaisa.

Sir Mekere i tok sampela ol bikpela tingting dispela senis bai kamapim i olsem:

• Long promotim gutpela wok bilong ol fainensel sistem long PNG;

• Opim dua bilong lukautim ol institusen i gat pawa bilong wok;

• Long lukautim ol lain i save putim mani insait long ol institusen i gat pawa bilong mekim kain wok;

• Lukautim pasin bilong yusim ol nem na tokaut long ol samting; na

• Givim Sentrel Beng sampela wok na pawa wantaim rispek bilong lukautim ol institusen i gat pawa bilong mekim kain wok.

Sir Mekere i tok dispela nupela ekt i soim insait long ol fainensel maket olsem ol i ken stapim ol 'pyramid' skim na lukautim ol bikpela wok bilong mani.

Palamen stretim lo bilong viles kot

PALAMEN i stretim na pasim lo bilong viles kot aste long strongim na kamapim gutpela wok bilong ol viles kot long kantri.

Dispela i givim tok orait long senisim sampela tok-tok i stap pinis insait long dispela bil na putim ol nupela toktok.

Sampela ol senis long Seksen 1 bilong Viles Kot Ekt i olsem:

• long putim mining bilong tok 'Community Work Order' bipo long mining bilong Deputi Provinsel Supavaising Majistret; na

• Long putim nupela sabsekseks we i glasim astingting bilong ol komyuniti wok oda.

Lo bilong Beng bai stapim paul pasin na ol piramid skim

LONG sapatim dispela bil, Memba bilong Kokopo Sir Rabbie Namaliu i tenkim Sir Mekere long kamapim dispela bil long wanem em i tok dispela bil bai banisim Gavman long yusim ol beng na ol fainensel institusen long laik bilong ol.

Sir Rabbie i tok bipo taim i nogat dispela bil, planti ol paul pasin i kamap na hevi bilong ol dispela paul pasin em nau kantri na ol pipel

bilong PNG i wok long bungim.

Em i tok taim dispela lo i kamap kain ol pasin bilong paulim mani insait long Nesenel Provident Fund, bai i no inap kamap.

Em i tok tu olsem dispela bai stapim ol 'pyramid' skim we i bin stap bipo na planti ol pipel bilong PNG i putim mani i go insait wantaim tingting bilong kisim 100 o

200 pesen win mani.

Sir Rabbie i tok planti ol pipel bilong PNG husat i putim mani long dispela ol 'pyramid' skim i bel hat na i stap na liklik taim ol i ken kisim lo i go long han bilong ol yet.

Olsem na em i tok kain bil we Sir Mekere i kamapim bilong lukautim wok bilong ol beng na ol fainensel institusen bai stapim ol kain pasin nogut long kamap.

Ol turis opis kaikaim mani

MINISTA bilong Kalsa na Turism Andrew Baing i tok Nesenel Gavman i bin givim Tourism Promotion Authority K3,300,000 long rikarent baset na K600,000 long Developmen baset.

Wantaim dispela mani Tourism Promotion Atoriti (TPA) i yusim olgeta K600,000 bilong ronim ol opis long Los Angeles na Frankfurt na K1.2 milion long ronim tripela opis long PNG.

Em i tok long dispela as ol i gat K1 milion tasol bilong karim aut ol wok program bilong ol long wan wan yia.

Mista Baing i tok tu olsem namba bilong ol turis i kam long PNG i bin go daun long 1999 long mak bilong 67,368. Long 1998 namba bilong ol turis i kam long kantri i bin stap antap long 67,830.

Em i tok TPA long dispela yia i kamap wantaim sampela plen bilong karim aut gut wok bilong en olsem:

• Stap insait long ol intanesenel maket na pomosen wok ol i makim wantaim astingting bilong lukautim na strongim maket i stap pinis long Amerika, Yurop na Ostrelia;

• Developim wanpela rijinel maketing na pomosen pasin wokbung wantaim Solomons na Vanuatu long promotim ol eksperiens bilong Melanesia long wol;

• Go het wantaim ol plen wantaim astingting bilong kamapim TPA olsem wanpela bisnis bilong kisim moa memba we i gat rot bilong kisim mani na makim mak bilong dipatsa takis;

• Kamapim ol ples bilong pilai, painim pis, bikpela na liklik kibung, ol gutpela samting ol turis inap kisim na ples bilong salim ol samting wantaim turis bot bilong kisim ol turis i go raun na lukim ples;

• Wok bung wantaim ol provinsel gavman long karim aut ol turis plen;

• Go het long skuim ol wok manmeri na karim aut ol awenes long ol ples na long provinsel level;

• Pinisim wok bilong kamap wantaim wanpela stendet level bilong awenes na pasin bilong karim aut dispela awenes insait long dispela industri;

• Stretim opis bilong turis long Frankfurt, Germany na Los Angeles, Yunaited Stet bilong America na statim wanpela opis long Japan sapos i gat mani; na

• Helpim ol turis opereta long kantri long maketim ol program bilong ol long winim turis maket long arapela kantri we bai i kamap long Olimpik pilai long Sydney.

• Memba bilong Goroka Henry Smith (namel) i sanap wantaim ol viles bilong Hobe na Nagamize long Gahuku eria bihain long em i givim kes mani na wokabaut somil masin long wik i go pinis. Poto: Sape Metta.




Kamapim tupela turis provins long kantri

GAVANA bilong Madang Jim Kas i tok em i amamas long toktok bilong Mista Baing na i tok Gavman mas kamapim tupela turis provins olsem senta bilong wok bilong turis long kantri.

Em i tok Gavman i mas traime long yusim dispela tupela provins bilong kisim ol turis i kam long kantri na bihain salim ol dispela turis i go long ol arapela provins long lukim kain kain kalsa, tumbuna pasin, maunten na solwara, rip, bus na olgeta gutpela samting dispela kantri i gat bilong ol turis long lukim. Em i tok taim ol dispela turis i laik go bek long kantri bilong ol, ol i ken go bek long wanem ol taun TPA i makim bilong ol turis i kam na lusim PNG long go bek long kantri bilong ol.

Gavana Kas i tok lo na oda em i no hevi long kantri. Em i tok hevi i stap long pasin bilong rispekt we i nogat long PNG. Em i tok ol pipel bilong PNG i mas kisim skul bilong gat pasin bilong rispektim arapela arapela. Sapos dispela i stap planti turis bai amamas long kam long kantri.

Em i tokim Palamen tu olsem em i no amamas long lukim wanpela ripot long wanpela niuspepa long Brisbane long sampela mun i go pinis we ol i tok, 'Mosbi em i wanpela bilong 10-pela arapela siti long wol we i gat planti pasin birua long en'.



OL pipel i no ken paul na ting olsem Nesenel Senses em i wankain olsem Nesenel Ilekxen. Dispela toksave i kam long Dairekta bilong Senses, John Kalamoroh.

Mista Kalamoroh i tok em i wari bikos planti pipel i ting nesenel senses em i nesenel ileksen.

"Dispela i krancki tingting," em i tok.

Mista Kalamoroh i tok lain i go pas long wok ileksen, Ilektral Komisn i save mekim wok bilong kisim nem na stretim ol Ilektral rol.

Ol ripot na toktok long Senses em i bilong helpim ol plen bilong wanem kain developmen bai kamap long kantri long bihaintaim.

Aninit long lo, i tambu tru long givim ol dispela wan wan ripot bilong Nesenel Senses i go long Ilektral Komisn.

Nesenel Statistiks Opis, (NSO) i go pas long wok bilong Senses na em i stap aninit long Dipatmen bilong Pleding na Monitoring.

Mista Kalamoroh i tok NSO em i mekim stret wok bilong em na wok politik i no stap insait long en.

"NSO i no gat bisnis wantaim wok politik" em i tok.

"Mipela i no bungim ol ripot long givim long wok ileksen, o takis o ol sios, nogat."

Mista Kalamoroh i tok em i mekim dispela tok save bikos planti paul toktok i kamap pinis we ol opisa bilong Senses long Hailans i painimaut olsem ol pipel i ting Senses em i wankain olsem wok ileksen.

Bos bilong NSO, Nick Savulo i tok, aninit long lo, Nesenel Senses i mas kamap wan yia bipo long Nesenel Ilekxen, tasol dispela i no kamap bikos trabel bilong Ilekxen bai inap bagarapim wok bilong Senses.

Em i tok tu olsem i save gat hevi bilong painim mani bilong mekim dispela wok.

Em i tok gavman i no gat mani bilong mekim wok bilong Senses bihain long olgeta faipela yia.

Long dispela yia, gavman i no bin givim mani inap long mun Februari na dispela i sloim daun wok bilong stretim ol samting.

Gavman bai spendim moa long K27 milion kina (twenty seven milion kina) long mekim dispela bikpela wok long 2000 Nesenel Senses. Bai ol i yusim K16.5 milion (Sikstin milion faiv handet tausen kina) long stretim olgeta wok bilong kaunim ol pipel. Orait bai ol i yusim lepova mani long mekim ol narapela wok bihain long wok bilong kaunim ol pipel i pinis.

Gavman bilong Australia i givim helpim mani long mekim dispela wok bilong senses.

Long yia 2001 i go inap 2002, bai Nesenel Statistiks Opis i mekim wok bilong raifim ripot na ol narapela toksave em ol i bungim insait long Senses.

● Gavman bilong Papua Niugini na Gavman bilong Australia i sapatim 2000 Nesenel Senses.



Manus PPC skruim lo na oda aweanes long Maus bilong Chauka

PROVINSSEL Plis Komanda Inspekta Benedict Benser i karimaut wanpela pablik aweanes program bilong toktok long lo na oda long "Maus bilong Chauka" em Redio Manus.

Inspekta Benser i tok program i save kamap long olgeta Fonde nait em i karamapim ol lo na oda isu na em i sut long komyuniti na moa yet. long ol yangpela olsem

aweanes long klia gut long ol samting na ol bai traim long abrusim ol hevi na trabel.

Inspekta Benser i tok long program bilong tunait, em bai toktok long drags na ol hevi na bagarap we mariwana i kamapim long man, komyuniti na sosaiti.



Em i tok hevi long drags i no kama p bikipela yet long Manus tasol i moa beta long lukluk long hevi na stapim nau.

Em i tok liklik lain

yangpela man long Manus i stat pinis long kisim mariwana. Em i tok long stat bilong dispela yia, plis i bin holim na sasim tupela man long smokim na i gat wantaim ol dispela smok nogut mariwana.

Long wankain taim tu, Inspekta Benser i tok plis i holim pasim foapela man husat i bin wokim stil pasin long wanpela stoa klostu

long Lorengaun maket long las wik Mande.

Em i tok foapela man i bin stilim moa long K1,000 long stoa ya na ol i ronawer i go olsem long Pitulu tasol gutpela wok bung, namel long komyuniti na plis i mekim na ol plis i holim pasim na sasim foapela stil lain.

Wokbung namel long plis na komyuniti skruim gutpela sindaun long Manus

OL PIPEL bilong Manus i wok gut wantaim ol atoriti long lukim olsem sindaun long hap i go gut tasol na provins i stap isi wantaim nogat trabel tumas.

Provinsel Plis Komanda Benedict Benser i tok em i amamas long gutpela wokbung i stap namel long komyuniti na ol plis we i mekim na i nogat bikipela hevi tumas long lo na oda insait long Manus.

"Wokbung namel long ol pipel, komyuniti na plis i gutpela na mi amamas long en. Ol komyuniti lida na pipel i putim han wantaim plis long daunim ol hevi na developim provins.

"Long dispela taim, i nogat bikipela trabel o meknais i kamap long Manus na provins i stap kwait na ples i stap isi olsem, stat long las mun yet. Manus i wan-

pela gutpela provins na i no save gat bikipela meknais long lo na oda i kamap long en long planti taim.

"Tru ol liklik meknais i save kamap we plis i save kisim ol man long en olsem tok nogutim narapela, pait pasin na ol liklik samting olsem tasol plis i was gut long daunim ol dispela," Inspekta Benser i tok.

Insait long laspela tupela yia, plis i bin karimaut ol aweanes long kirapim gutpela wokbung namel long ol na komyuniti. Kaikai bilong dispela i wok nau.

Inspekta Benser i tok em i salim sampela plis opisa i go long Pak Ailan bilong karimaut wok painimaut long wanpela meknais i kamap long hap long las wik.

Em i tok wanpela man i bin sut long M16 gan bihainim wanpela


belkros wantaim narapela man long Pak Ailan. Man i pairapim gan i bilong Rambutso Ailan, Inspekta Benser i tok.

Em i tok em no laikim dispela hevi long go bikipela na em i salim sampela plis opisa long go long hap na painaut moa long trabel ya.

Inspekta i tok man ya i bin go long haus bilong narapela long nait na taim ol i ronim em, em i pairapim nating gan.

Inspekta Benser i tok em bin salim ol opisa i go long Pak bikos long las yia, sampela hevi i bin kamap namel long ol Pak na Rambutso Ailan pipel bihainim ol bikheth pasin bilong ol yangpela husat i dring spak na wokim nabaut.

Papa na pikinini soldia wok long Bogenvil



• Papa Ian na pikinini meri Melissa long Bogenvil. Foto: David Elliott.

PIS Monitoring Grup long Bogenvil i gat papa na pikinini i wok long en.

Em long WO2 Ian Paterson na pikinini meri SIG Melissa Peterson. Ol i wok wantaim Operesen Bel Isi we 300 Pis Monitas bilong Australia, Nu Silan, Fiji na Vanuatu i wok long en long olgeta hap bilong Bogenvil.

WO2 Ian i bilong 4 Fil Rejimen long Taunsvil, Australia. Em i stap long ami long 25 krismas nau.

Long las yia em bin joinim Operesen Bel Isi bihainim long em i kisim nius olsem em bai joinim 8 Alpha rotesen.

Taim Melissa i bin go long Krismas malolo, em no bin save olsem em bai go wok wantaim papa bilong em long Bogenvil. Taim em i go bek long wokples bihainim long malolo long Darwin, em bin kisim nius long wok long Bogenvil. Em bin amamas tru na ringim papamama na toksave long gutpela nius i go long ol.

Mama bilong Melissa i bin wok long ami long 13 krismas na em i pinis tasol na olsem, dispela wok i no nupela samting.

Melissa i tok bikos em i groap long ami be, tingting long joinim wok wantaim ol i bin laik bilong em yet

Papa bilong em i bin joinim ami long 1975 na famili i save stap long Perth, Albury na Taunsvil.

Melissa i tok bikos papa bilong em i lukautim Q Stoa, em no min olsem i si long em long kisim ol masin samting, nogat.

Na papa Ian i tok em i amamas long pikinini i stap klostu bikos em ken stretim kompyuta bilong em taim em i bungim sampela hevi.

Tasol i gat ol sait nogut bikos papa i mas was gut long wanem sapos em i wokim wanpela asua, Melissa i ken ripot long mama.

Ian i tok em i amamas long gutpela wok we ol yangpela soldia i karimaut long Bogenvil, moa yet ol lain i wokim pat taim.

Em i tok ol i gat planti risev soldia long operesen tasol ol i wokim wankain wok olsem ol fultam soldia.

Tupela papa na pikinini i tok i kam inap nau Operesen Bel Isi em bikipela samting long wok bilong ol wantaim ami.

Namba tu pikinini meri tasol husat i sku! yet long Taunsvil em Caroline.

Papa Ian i tok em no klia long tingting bilong yangpela pikinini yet sapos em bai joinim ami tu o nogat.

Nupela Kiwi pis kipas long Bogenvil

TENPELA nupela Nu Silan pis kipas i bin go long Bogenvil long kisim ples bilong ol wantok bilong ol i no longtaim i go pinis.

Samting ya i bin kamap taim Nu Silan Foren Minista Phil Goff na lain bilong em i raun i go lukluk long Bogenvil.

Wanpela seremoni long tok gutbai na welkamim ol nupela

Kiwi pis kipas i bin kamap long Arawa.

Ol Kiwi i bin kamapim tumbuna danis bilong ol Maori piple ol i kolim long Haka we long dispela tasim i kamap olsem wanpela gutpela stail danis ol pipel na ol Pis Monitoring Grup (PMG) long Bogenvil i save amamas long lukim.

Insait long Nu Silan pis kipas we i bin lusim Bogenvil long taim tripela mun wok i pinis em long ami saplen, Pater Ron Bennett na ol sinia momba bilong hetkota staf.

Ol nupela Kiwi pis kipa i bin stap tupela de long Arawa hetkota bipo ol i putim ol long nupela posting long ailan.



Nupela memba bilong Yangoru Sausia opim palamen kibung



• Gavan bilong Is Sepik provins, Arthur Somare wantaim ol bosman bilong Fletcher Morobe Kampani i sainim pepa bilong kirapim Storm Water Projek long Wewak.



• Ol palamen lain bilong Australia i bin raun lon g Wewak las yia na lukluk long ol woa memorial pak lon g hap.

NUPELA memba bilong Yangoru Sausia Bernard Hadoria i bin opim palamen kibung long las wik Tunde taim em i namba wan man long stap insait long gavman bisnis bilong palamen long dispela yia.

Taim palamen dua i op kibung i stat bihain tasol long bikipela prea Moderata Reveren Samson Lowa i mekim long opim palamen kibung bilong yia 2000, Spika Bernard

Narokobi i go stret long namba wan bisnis bilong palamen we i tokaut long Nesenel Kot disisen we i tokaut olsem Bernard Hadoria em nupela memba bilong Yangoru Sausia bihain long ol wokman bilong ilektoret Komisn i kaunim gen ol vot pepa bilong Yangoru Sausia ilektoret.

Mista Narokobi i tokaut olsem Nesenel Kot i tokaut long Bernard Hadoria em nupela memba bilong

palamen makim ilektoret bilong em long Is Sepik provins.

Tupela memba bilong palamen, Gallus Yombui bilong Wasera Gawi wantaim Gabia Gagarimabu bilong Saut Flai i kisim Mista Hadoria long dua i go long fran we em i mekim promis na sainim ol pepa bilong em long ai bilong Spika bilong palamen.

Mista Hadoria i kisim ples bilong olpela memba Gabriel Dusava. Tasol Mista Dusava i tok em i ama-

mas na bai wok klostu wantaim Mista Hadoria long sevim ol pipel bilong Yangoru Sausia. Klostu tupela krismas olgeta ol pipel bilong Yangoru i nogat memba long haus palamen bikos kot bilong Lidasip Traibunel i bin rausim Gabriel Dusava olsem lida.

Mista Hadoria i gat tupela krismas tasol long mekim wok bilong em long bring ol sevis na helpim i go long ol pipel bilong Yangoru Sausia.

Opening bilong Aipokon helt sab senta

Provinsal edministreta bilong Sandaun provins Maran Nataleo i opim nupela Katolik Misin helt sab senta long ples Aipokon insait long Malol eria long Mande, Mas 27, 2000.

200 manmeri wantaim wanpela singsing grup bilong Tanyip Ailan insait long Malol komyniti i kam lukluk na soim hamamas bilong ol long dispela opening. Wanpela grup bilong Holland long Yurop husat i save wokim wok halivim long ol turangu kantri olsem PNG ol i kolim Memisa i givim mani i kam long bildim dispela nupela helt senta. Memisa i givim planti halivim i kam long Raihu Haus sik bipo long dispela bikipela solwara i bagarapim ol ples insait long distrik bilong Aitape. Taim disasta i kamap ol i givim bikipela moa halivim i kam long Rihabilitesen program. Memisa i tromoi K166,000 long kamapim dispela nupela sab senta we ol wokman bilong Rehab i bildim.

Ol Malol i askim olpela Bisop bilong ol husat i nau asbisop bilong Mosbi, Brian Barnes long kam stap namel long ol long blesim tu Aipokon helt sab senta na skol.

Katolik Helt Sekretri, Agatha Grace

Maiya i tok strong long ol manmeri long lukautim gut dispela nupela helt senta bilong ol. Em i tok, "planti manmeri i bin lusim laip bilong ol na nau mipela i kisim dispela helt senta."

Bihain long toktok bilong em siaman bilong dispela rihabilitesen (rihab) program, Tas Maketu, tokaut olsem wok bilong em wantaim dispela helt senta i finis nau na em i givim nau dispela nupela hausik i go long bod ol menejmen bilong helt sab-senta.

Bisop bilong Aitape na man i bosim tru dispela rihab program Bisop Austen Crapp i tok tenkyu long siaman bilong em long hat wok ol i mekim long kisim mani na bihain long bildim dispela senta. Bisop Austen i tok olsem em i givim wok long siaman na ol komiti long bildim dispela ol samting na em i lukluk nating tasol long wanem em i tok wok bilong misin em long givim sapot long sait bilong prea.

Em i tok tu olsem wok bilong wanwan manmeri long komyniti em long lukautim helt senta na long wok hat long kamapim gutpela sindaun insait long kantri bilong yumi. Em i askim ol manmeri long "bung wantaim na wok wantaim."

Kumbakor kisim sas long paulim mani



• Andrew Kumbakor.



NESENEL memba bilong Nuku Andrew Kumbakor i kamap long ai bilong Kot long sas bilong paulim mani bilong ilektoret. Dispela mani em Rurel Developmen Fan (EDF) mani bilong ol pipel long kirapim ol projek na sevis

insait long ilektoret.

Plis i sasim Mista Kumbakor long las wik na em i baim beil long K500 na stap ausait wetim kot bilong em long dispela wik. Tasol Kot i surukim taim bilong kot i go moa long neks mun Mei 3.

Wok painimaut i soim olsem em i bin yusim moa long K70,000 bilong ilektoret long ol samting we dispela EDF mani i no ken go long en.

Tasol Mista Kumbakor i tok em bai salensim dispela ripot long kliam gut nem bilong em bikos em i bilip sampela politiks i mekim dispela pasin long daunim em. Em i bilip dispela sas em i kisim i wok bilong pasin politiks tasol long daunim em. Olsem na em bai pait long mekim klia gut nem bilong em.



nias


Morobeen
BEEF
CRACKERS

IGAT kick!

HEPI BIRTHDAY

25%
MORE

5 BISKETS INSIDE-1 FREE



Hailans Nius

Ol rurel kopi groa sapatim freit sabsidi

PLANTI pipel insait long Karamui long Simbu na Marawaka long kona bilong Isten Hailans provins i amamas tru long "Freit Sabsidi Skim" we Kofi Industri Koporesin (CIC) i kamapim long helpim ol.

Ol viles lida na ol kaunsil i tok olsem dispela freit sabsidi helpim bilong CIC bai bringim planti kopi bilong ol we i stap long longwe ples na i nogat rot. Planti ol dispela ples i gat ples balus tasol i stap.

CIC bai helpim ol dispela rurel kopi growa long peim 40 pesen bilong balus fea long karim ol kopi bilong ol i go long maket. Narapela 60 pesen em ol kopi growa yet bai peim.

Ol pipel i tok ol i amamas bikos dispela bai helpim ol long kisim gutpela prais long kopi bilong ol taim CIC i helpim long peim 40

pesen kos bilong balus fea.

Dispela 40 pesen em CIC i peim i helpim ol kopi fama long sevim mani bilong ol na baim ol gutpela samting we i ken helpim wok divelopmen long famili na komyuniti bilong ol.

Insait long wanpela bikpela bung we i bin kamap long Marawaka stesin planti ol lida na kaunsil bilong Marawaka i amamas tru long wanem samting CIC i wok long mekim long helpim ol pipel insait long bus bilong kantri long karim kopi bilong ol i go long maket na salim.

Ol kopi fama long Marawaka i save kamapim moa gutpela kwaliti kopi, tasol planti taim ol i save hatwok tru na westim mani long baim balus fea na tu ka long karim ol kopi bilong ol i go salim. Olsem na

dispela helpim bilong Freit Sabsidi CIC i kamapim bai helpim ol gut tru.

Marawaka em i stap longwe tru insait long bus bilong Isten Hailans provins. Nogat rot i stat long Marawaka i go olsem long Goroka, bik taun bilong Isten Hailans. Ol pipel bilong Marawaka i save yusim wanpela rot tasol we i go olsem long Menyamy na go olsem long Bulolo rot. Ples ya i stap klostu long Menyamy long Morobe provins.

Karamui tu em i stap longwe tru long Simbu provins. Ol pipel long dispela eria i save yusim balus long trenspot. Sampela taim ol i save wokabaut i go olsem long Simbu.

Jenerel Menesa bilong CIC-Ekstensim Sevises Divisen, Jon

Yogyo i bin salim Freit Sabsidi Kodineta Mista Bernard Goma na narapela ofisa i bin go toktok wantaim ol pipel na ol lida long Marawaka long dispela gutpela helpim bilong ol kopi fama husat i save stap long bus na longwe ples.

Freit Sabsidi i bringim ol kopi fama husat i stap longwe long go bungim sentrel maket na salim kopi bilong ol wantaim kos bilong freit we em 40 pesen. Dispela 40 pesen em CIC bai peim. Dispela i helpim ol dispela fama long daunim kos ol bai peim i go long balus kampani. Long dispela rot em bai helpim long givim bek 40 pesen prais bilong pasmen kopi i go long ol fama. Dispela Freit Sabsidi i mekim groa i peim 60 pesen tasol olsem freit kos i go long balus

kampani long karim kopi bilong em.

Freit Sabsidi em wanpela bilong ol dispela polisi bilong Kopi Industri Koporesin aninit long Grup Maketing bilong en, we Extensim Sevises Divisen bilong CIC i save karimaut wok long bringing helpim i go long ol kopi fama insait long kopi industri long Papua Nuigini.

Dispela helpim i wok insait long sait bilong skulum ol kopi fama long bringim ap sistem bilong maketim kopi bilong ol, taim ol yet i kirapim ol smolholda maket grup bilong maketim kopi bilong ol i go long ol rejista kopi mil ol prosesa na kisim gutpela prais.



• Sampela lain long Hagen siti i soim ol botol OP. Dispela em ol strongpela dring gavman i tambu tru long noken karim i go insait long Simbu, Hagen, Wabag na Mendi. Ol dispela OP i go olsem wanem em yumi no save.

Asples askim Waghi Mek long baim K100,000

JAMES SAKUL i raitim

WANPELA man i bin dai las wik bihain long ol man i ronim em na paitim em wantaim kopi stik na pun-daunim em i go daun long baret long Waghi eria long Westen hailans provins.

Yangpela man ya nem bilong em Paul Nongoi na em i bilong ples Talu ples long asples graun we bikpela kopi faktori bilong Waghi Mek i sanap long en. Ples Talu i stap samting olsem 5-pela kilomita ausait long Banz taun.

Long dispela taim yet ol asples i go bungim menesmen bilong Waghi Mek na

autim wari bilong ol long kampani. Bikos ol i strong olsem em ol sekyuriti gad bilong kampani i bin kamapim dispela birua long man ya na i dai.

Toktok i kamap olsem dispela man i dai i bin stilim ol seri kopi bilong kampani long Mintal plentesen taim ol lain i ronim em na givim birua long em.

Ol asples i strong olsem mak bilong kompensesen em kampani i mas baim K100,000.

Waghi Mek plentesen em bisnis bilong Not na Saut Waghi lokol level gavman kaunsil na ARMS menesmen. Papa bilong ARMS

menesmen em Dick Hagon na em tu i menesing dairakta bilong Waghi Mek. Kampani i putim olgeta hevi ya i go long han bilong plis na lo.

Plis ripot i tokaut olsem ol i no inap tokaut yet long wanpela samting long dispela hevi bikos ol i wok long mekim wok painimaut yet long dispela birua na tu wetim pos moten ripot bilong dokta long haus sik.

Wanpela skwat bilong ol plisman i sanap was' pinis long Talu eria nogut bel hevi bilong ol asples i kirapim trabel wantaim kampani na ol wokman bilong en.

Hagen turism opis i no laikim Kalakai maket

TIMOTHY AIMS i raitim

WESTEN Hailans Turism Promosen Atoriti Bod long las wik tokaut long rausim Kalakai buai maket long maus rot bilong Hagen siti.

Provinsal Bod siaman Peter Kewa i tok dispela buai maket i bagarapim pes bilong Hagen siti.

Mista Kewa i tok taim ol ovasis turis i kam raun long Hagen siti ol i lukim dispela maket i doti na nogut tru long ai bilong ples taim ol i raun lukluk long Westen Hailans provins.

Mista Kewa i tok taim ol i lukim dispela doti long maus rot, ol bai ting olgeta hap bilong Hagen siti i doti olsem.

Em i tok mi man bilong dispela siti na mi mas tokaut long ol samting we i no stret long gutpela nem bilong namba tri siti bilong yumi.

Dispela i soim olsem ol pipel bilong Westen Hailans yet i wok long bagarapim gutpela nem na wok bilong provins, em i tok.

Em i laikim bai i mas gat

sampela bisnis na stua i sanap long dispela maus rot i go insait long Hagen siti na i no dispela kain doti ples.

Mista Kewa i tokaut tu olsem Kalakai maket tu i mekim ples i pulap tru long ol pmv ka na mekim hat long ol i muv i go kam. Ol das na doti tu i mekim ol kaikai ol manmeri salim long maket i no gutpela long baim na kaikai we inap kamapim sik.

Ol manmeri i save amamas long go long Kalakai maket tasol ol i no save long wanem samting inap kamap olsem sik na hevi o bagarapim gutpela nem na pes bilong Hagen siti na provins olgeta.

Mista Kewa i tok salim buai i no wanpela bun wok tru bilong ol hailans long kisim mani. Em i olsem sindaun nating tasol na wetim mani long kam.

Provinsal siaman bilong TPA i askim ol lida bilong provins na atoriti long toktok na mekim samting long dispela maket.

Em i tok ol ovasis turis i save kirap nogut tru long

lukim kain maket olsem i sanap stret long maus rot bilong siti na Okuk haiwe.

Em i tok em i mekim dispela toktok bikos TPA opis bilong em i bin kisim pinis sampela ripot nogut long dispela maket. Ol manmeri i no save gut long tromoi ol pipia igo long rabis ples stret tu.

Mista Kewa i tok Hagen siti i save gat gutpela nem na rekot olsem em i wanpela gutpela na klinpela siti. Tasol taim Kalakai buai maket i kamap liklik taim i go pinis, sampela ripot nogut i stat long kamap.

Em i laikim kain maket olsem i mas go stap arere long siti wantaim gutpela banis na ples bilong ol ka i ron i go kam. Nupela maket ples i mas kamap na ol manmeri i ken sanapim ol gutpela stua tu na salim ol kaikai na ol samting.

Mista Kewa i tok Kalakai maket i sanap stret long ai bilong taun olsem na ol atoriti i mas toktok na mekim sampela senis long dispela.

Wok bai stat long Kisenepoi rot: Pogo

JOE KANEKANE i raitim

MINISTA bilong Woks na Implementesen Alfred Pogo i tokim palamen olsem nambatu hap bilong wok long namel long Kisenepoi na Mendi bai kamap na gavman i no gat tingting long lusim dispela rot.

Mista Pogo i tok tru wok i stop long wanem i nogat mani long pinisim narapela hap bilong dispela kontrak tasol ol toktok i wok long kamap namel long gavman bilong PNG na Ausaid na i no long taim bai sampela wok i kamap.

"Nau yet mipela i wok long holim ol toktok wantaim ol lain bilong Ausaid na taim mipela i kamap long wanpela agrimen long surukim moa mani long dispela prosek wok bai stat," mista

Pogo i tok.

Em i tok dispela rot i wanpela hap bilong Okuk haiwe we ol bikpela kampani i save yusim long ol wok bilong ol na em i laik bai wok i ken kamap kwik long wanem planti ol bikpela prosek i stap long Kutubu, Hides Mt Kare.

Mista Pogo i bekim askim bilong memba bilong lalibu-Pangia Roy Yaki husat i askim tingting bilong gavman long dispela rot.

Mista Yaki i tok olsem em i kisim longpela taim long gavman long wokim kliat tingting bilong em ol olsem na ol pipel i laikim sampela bekim.

Long askim bilong Gulf-Sauten hailans haiwe mista Pogo i tok ol agrimen namel long gavman na kampani na bihainim sampela olsem na gavman na bihainim long yu 1998

inap long luksave.

Mista Pogo i tok tru dispela rot bai bringim planti halivim i go long ol pipel na tu lon g dispela prosek tasol olgeta agrimen i mas bihainim gutpela wok long larim dispela wok i kamap.

"Mi laik toksave olsem gavman bai no inap luksave long ol prosek we i gat planti toktok i stap long em. Dispela gavman i laik lukim olsem wanem olgeta rot i mas stap long ples kliat," em i tok.

Em i tok tu olsem ol bikpela haiwe i gutpela long gavman i wokim na ol i no inap long lusim tingting. Lokel kampani Global konstaksen i bin wokim dispela rot namel long Mendi na Wara Angula na ol i no wok moa bihainim tasol long mani em ples long yu 1998

Madang Nius



Skulim ol pikinini long Tok Ples

SYLVIA AVITU i raitim

OL pikinini long Papua Niugini husat i kisim skul bilong Tok Inglis i save kisim hat taim long rit na rait taim ol i go long skul, wanpela tisa bilong Divine Word University i tok.

Tisa Catherine Levy i tok: "Ol pikinini husat i save tok Pisin o tokples bilong ol yet na taim ol i save go long skul na lainim nupela tokples. Sapos ol i rit na rait long tokples bilong ol yet, dispela i mekim isi long ol long lainim Tok Inglis."

Tisa Levy husat i wok long stadi long Tokples Awar i tok Tokples Awar em i no wankain olsem Tok Inglis. Kain olsem: "Long Tok Pisin i gat wanpela we bilong tok,

'long ap'. Tasol long Tokples Awar i gat kain kain we bilong tok 'long ap' na wanpela tok i gat kain kain ming."

Em i tok i gat tripela ples i save tokples Awar. Ol dispela ples i stap long Hansa Basis samting olsem 30 kilomita longwe long Bogia distrik. Em i tok Awara em i no nem tru bilong tokples. Ol German lain i bin givim dispela nem. Nogat mani save long nem tru bilong dispela tokples.

"Long tingting bilong mi, tokples i save tokaut long tingting bilong ol pipel long dispela graun na wanem kain we ol i save lukim dispela graun," em i tok.

Tisa Levy i tok ol pipel bilong Awar i mas lukautim gut tokples bilong ol. Em i

tok sapos ol i lusim tokples bilong ol, ol i ken lusim kalsa bilong ol bikos i gat moa long wan tausen kain kain tokples.

Long dispela taim em i wok long wanpela 350 pes buk. Astingting bilong dispela buk em long skelim ol kain kain nois na grama bilong Awar.

Em i hop long sampela yia bihain ol pikinini long namba wan yia bilong skul i ken rit long tokples bilong ol yet.

Tisa Levy i tok PNG i gat planti tokples na samting olsem wan ted bilong olgeta tokples long dispela graun i kam long PNG. Madang tasol i gat 120 kain kain tokples.

Em i tok Madang i gat bikipela namba bilong kain kain tokples long PNG.

Ol Divine Word ripota sumatin go long tsunami eria



• Aitape Daiosis na ol lokol pipel bilong ol ples tsunami i bin bagarapim ol i bin askim ol sumatin bilong Divine Word Universiti long Madang long go raitim stori bilong sindaun bilong ol long dispela taim. Piksa i soim wanpela famili bilong ples Malol we tsunami i bin bagarapim ples bilong ol long 1998. Poto: Wenceslaus Magun.

PAUL ZUVANI i raitim

OL Divine Word University sumatin husat i stadi long Communication Arts dipatmen i bin go long Aitape long kisim nius ripot bilong sindaun bilong ol pipel long ol ples we bikipela solwara 'tsunami' i bin bagarapim ples bilong ol na kilim moa long 2000 pipel.

Ol i bin go long Aitape long Fraide Mas 24 na i go bek long Madang long Mas 31.

Samting olsem 21 sumatin

i bin go long Aitape wantaim het tisa bilong dipatmen bilong ol Joe Weber.

Mista Weber husat i go pas long dispela wokabout i tok dispela em i namba wan taim Communication Arts dipatmen i kamap wantaim kain tingting bilong mekim kain wokabout olsem. Em i tok kaikai bilong dispela wokabout bai skelim sapos dipatmen i ken go het long holim ol kain wokabout long bihain taim o nogat.

Em i tok ol sumatin i gat

tupela astingting bilong go long Aitape.

Namba wan astingting em long tok orait bihainim wanpela askim i kam long ol lokol komyuniti long helpim na raitim ol ripot bilong wanem ol samting i wok long kamapim long ol ples tsunami i bin bagarapim.

Na namba tu astingting em bilong givim sans long ol sumatin long yusim save ol i kisim insait long klasrum long mekim tru wok bilong raitim nius.

Divine Word University bai wokim K6 milien laibreri

HELEN KASSMAN i raitim

DIVINE Word University i plen long stat wokim wanpela nupela K6 milien laibreri long Jun dispela yia.

Vais Presiden' bilong edministresen Marian McCreath i tok i mas gat moa spes long wanem yunivesiti i wok long gro na i gat moa buk i kam insait long

laibreri.

McCreath i tok: I nogat mani yet olsem na i nogat de bilong stat wok long dispela laibreri."

Em i tok ol bai wokim dispela laibreri wantaim ol nupela teknoloji.

Em i tok dispela laibreri bai i gat tu stori long putim 75,000 volum na bai i gat moa stadi eria, wanpela eria

bilong Noser laibreri, wanpela rum bilong grup kibung, wanpela rum bilong distens edukesen, na wanpela leksa tiata long kisim 150 pipel.

"Ol bai putim ol nupela komputa tu i go insait na bai i gat katalog, intanet, na Encarta encyclopedia i stap insait long dispela laibreri," em i tok.

AusAid na Canada aid helpim ol yet

'AusAid na Canada aid' save helpim ol yet na i no ol kantri ol i save givim sevis o mani long helpim ol, wanpela nius ripota bilong Canada husat i kam mekim foapela mun lukluk raun long kantri i tokim ol sumatin bilong Communication Arts long Divine Word University long Madang.

Ripota Erin Phelan bilong Canada Fund na Pacific Islands News Association i tok i no moa long 20 pesen bilong aid ol dispela kantri i save givim long Papua Niugini na ol arapela kantri long Saut Pacific em ol i save givim long ol dispela kantri.

Em i tok: "AusAid i save yusim 88 pesen bilong aid mani bilong em yet long

Australia na 12 pesen long PNG. Canada i save yusim 63 pesen bilong aid mani long Canada na 37 pesen long ol kantri i wok long develop."

Em i tok ol i save yusim dispela aid mani long baim ol meteriel na ol samting long kantri bilong ol yet we ol i ken baim long ol kantri i wok long develop yet.

Ripota Phelan i tok ol i save yusim bikipela hap bilong aid mani bilong ol ol wok olsem rot enjinia na akitekso o main bilong droim plen bilong haus.

Em i tok: "Ol i save baim balus tiket bilong ol dispela konsalten, ples bilong ol bilong slip na ol arapela ekspens. Sampela bilong ol i save gat opis bilong ol

yet." Ripota Phelan i tok ol kantri husat i save givim mani long ol kantri i develop yet i save kisim biknem long ol yet long wanem ol i no save givim wok long ol lokol pipel.

"Yupela i gat ol save manmeri long mekim wok," Ripota Phelan i tok.

Em i tok aid developmen em i wanpela bikipela bisnis. Em rot bilong strongim pasin bilong wok bung wantaim arapela kantri.

Em i tok ol kantri i save givim helpim i save kisim moa samting long ol lain ol i givim helpim long ol.

"Em i olsem taim yu kisim wanpela wok na yu wok long wanpela man o meri yu no laik wok long ol," Ripota Phelan i tok.

Divine Word sumatin bai helpim ol pipel long ples

PAUL NENGAI i raitim

WANPELA bisnis konsaltensi kampani, Donoghue Holding Pty Ltd bai kisim ol sumatin bilong Divine Word University long skulim ol pipel long ples long ronim bisnis. Ol dispela sumatin bai go long Ramu na Raikos eria long karim aut ol dispela skul.

Menesa bilong Donoghue Holdings Pty Ltd, Leo Sunari i tok kampani bilong em bai kisim foapela sumatin long wan wan term na long semesta holide long go aut na ronim ol dispela wokusap.

Em i tok kampani bilong em bai kisim tupela meri na tupela man sumatin bilong Business Studies dipatmen.

Em i tok long pinis bilong wan wan kos, kampani

bilong em bai askim ol nius ripota sumatin long go na raitim stori.

Mista Sunari i tok ol bisnis sumatin bai kisim samting olsem K150 long wanpela wik.

Samting olsem tupela nius ripota sumatin bai go wantaim ol lain ol i askim ol long go pasim woksap na witesim greduesen bilong ol lain i kisim bisnis kos long ples long sem de. Ol bai kisim mani bilong trenspot, kaikai, na poket mani tu.

Em i tok dispela skul bai i gat foapela hap, Introduction to Commerce na Business, Feasibility studies, Basic Book Keeping na System of Costing na Pricing. Wan wan bilong ol dispela hap bilong kos bai sanap long mak bilong K6,500.

Mista Sunari i wok wantaim non gavman ogenaiesen long 8-pela yia na bihain i wok olsem wanpela konsalten bilong European Union bipo long em i kamapim bisnis bilong em yet.

Em i gat Donoghue Holdings Pty Ltd na Donoghue Consultant Services olsem susa kampani bilong em.

Em i tok Donoghue Holding Pty Ltd i save mekim kain ol wok olsem Business Advice na consulting, Business training, Business Proposal Plan, Cash Flow, Business Feasibility Study, Monitoring na Evaluation, Community Development, Business Registration na Budgeting.

Lae Nius

Praim Minista oraitim K85 milien baset bilong Morobe

YAKAM KELO i raitim

PRAIM Minista Sir Mekere i oraitim pinis K85 milien baset bilong Morobe provinsal gavman long las wik Fraide. Provinsal asembli o Haus Tutumang i bin pasim dispela 2000 baset long Mande las wik na long Fraide Praim Minista i

oraitim.

Long las wik tu em saplai baset Morobe gavman i bin mekim wok wantaim i bin pinis na sem taim Praim Minista i oraitim 2000 baset bilong provins.

Pastaim asembli i bin wanbel long toktok bilong baset i mas i stap tupela wik pastaim long ol provinsal siaman na kaunsil presi-

den i stadi gut long wanem kain wok na ol eria bai baset i lukautim. Tasol bihain asembli i sakim dispela toktok bikos Ogenik Lo i no inap oraitim ol provinsal asembli long kamap taim nesenel palamen i sindaun long bung. Na tu saplai baset bilong provins bai pinis long dispela taim olsem na bikpela baset i mas kamap na wok i go yet.

Namba tu Praim Minista na mamba bilong Tewae Siassi Mao Zeming i bin kamapim dispela tingting long surukim provinsal baset i go tupela wik moa inap olgeta mamba i save long wanem samting i stap insait long baset ya.

Mista Zeming i tok em i nogat wanpela krangki tingting long dispela. Tasol bikpela samting em long larim ol pipel i luksave long baset bai i helpim ol olsem wanem. Bikos dispela baset i soim olsem bikpela mani bai igo long ol wok edministresen tasol na planti wok na projek insait long ol distrik level bai kisim liklik mani tasol.

Mista Zeming tu i sutim tok i go long ol loya na kuskus bilong asembli long i no givim gut tok stia long stapim dispela toktok bilong em we i mekim Tutumang i go het na orait long surukim baset i go tupela wik. Dispela em asua bilong ol loya na kuskus bilong Haus



• Minista Moi Avei katim ribon long makim Mumeng/Bulolo rot i op.

Tutumang, em i tok.

Long narapela toktok bilong siaman bilong Fainens Bob Dadae, Wantok i kisim klia toksave olsem Bob Dadae em i no kamap siaman bilong asembli long rot bilong ileksen. Tasol em i kamap mamba bilong asembli bikos em i makim komyuniti. Aninit long Ogenik Lo, i mas gat wanpela mausman bilong komyuniti, wanpela mausmeri bilong ol meri na mausman bilong

taun o Lod Meya long asembli. Long tilim wok bilong siaman, em Gavana bilong provinsa i gat dispela pawa long tilim wok long kaunsil presiden na ol dispela mausman. Olsem na Gavana Luther Wenge i givim dispela wok bilong Fainens i go long Bob Dadae aninit long pawa bilong Gavana long tilim na skelim wok. Bob Dadae i bin olupela sief ov staf long opis bilong Gavana.



• Mamba bilong Nawae Kennedy Wenge na mamba bilong Huon Galp Tukape Masani i amamas long opim 5 yia plen bilong Huon distrik long Salamaua stesen. Potos: Franco Nebas.

Stil long haus i bikpela long Lae

FRANCO NEBAS i raitim

BOS bilong plis long Lae Sief Suprintenden Awan Sete i salim strongpela tok lukaut i go long olgeta komyuniti long Lae i mas lukaut gut long taim ol i laik go aut long lokim gut ol haus bilong ol o putim ol lait i lait.

Mista Sete i mekim dispela toktok bihain long namba bilong brukim haus na stilim samting i go bikpela insait long siti.

Em i tok dispela pasin i wok long kamap long wanem planti taim ol papa bilong haus i no save lukaut gut taim ol i save go aut long nait na tu long de taim.

Narapela samting tu i mekim dispela stil pasin kamap em long ren taim nau i wok long kamap long siti.

Mista Sete i singaut long olgeta komyuniti long traim putim ol ol sekuriti lait bilong ol long nait na tu tok save long ol arapela lain i stap klostu long taim ol i go aut long de na lokim gut ol dua na windua.

Long wankain taim yet wanpela man i bin dai bihain long ka em i ron long en i kapsait long Okuk Haiwe rot.

Dispela eksiden i bin kamap long Erap bris ausait long Lae siti we wanpela toyota Hilux bilong Niugini Hailans Kopi i ron long hai spid i kapsait long Sande apinun.

Plis ripot i tok dispela ka i bin ron long hai spid taim ol i kamap long sap kona long Erap bris we draiva i kirap nogut na i kapsait.

Plis i bilip olsem man i dai em pasindia long ka na draiva i kisim bagarap i stap nau long Angau haussik.

Plis bos Mista Sete i givim strongpela tok lukaut i go long ol draiva i mas lukaut long dispela kona taim ol i draiv.

Em i tok dispela kona i lukim planti manmeri i dai pinis na ol i mas lukaut taim ol i draiv.

Plis tu i mekim wok painim aut bihain long wanpela stilman wantaim pistol i go insait long Telikom biens opis long Lae long Mande na hensapim meri husat save stap long kesia na stilim K1900, kes mani.

Plis i mekim wok panim aut yet long dispela hevi.

Long wankain taim yet wanpela boi husat i kisim bagarap long gan na i stap long lukaut

bilong plis long Angau haussik i ronawe long Mande.

Plis i bilip olsem ol wan trabel bilong em i bin helpim em long ronawe long haussik. Mista Sete i singaut i go long ol famili bilong boi ya na poroman bilong em long bringim em kam bek long plis long wanem em i kisim bikpela bagarap na i mas stap long haussik.

Em i tok sapos ol plis mekim wok painim aut na kisim em bai ol i sasim long ronawe long han bilong ol na tu bai sasim ol lain husat i lukautim em long haus bilong ol.

Em i tok plis i bilip olsem famili bilong dispela boi i save long wanem hap em i stap na i mas traim long bringim kam long plis. Sapos nogat ol plis bai sasim ol long lukautim man i ronawe long han bilong ol.

Plis tu long dispela taim i painim wanpela man husat i bin hensapim wanpela meri long Yuni geit wantaim naip na karim em i go long Bumbu wara klostu long CIS Buimo na bagarapim em.

Plis i mekim wok painim yet long dispela trabel.

Pasin pamuk i bikpela long Lae siti

SAPE METTA i raitim

LAE, biksiti bilong Morobe provins i stap nau long planti kainkain hevi we i wok long kamap na bagarapim stret siti.

Ol provinsal politisen, kaunsila na lokol lida i wok hat tru na lusim planti mani long traim daunim ol hevi na tu traim long klinim na mekim provins i kamap gut.

Dispela bai i no inap stapim ol hevi long wanem planti ol lain man na meri i pas tru long dispela pasin.

Dispela em i sampela toktok wanpela setelmen komyuniti lida, Paul Tom i bin mekim long wanpela setelmen komyuniti lida bung we i bin kamap long Lae las wiken.

Ol lida ya i bin toktok strong tru agensim

pasin pamuk. Mista Tom i tok pasin pamuk i kamap bikpela tru na i wok long bungim planti hevi na bagarap namel long planti famili. Na tu taim pasin pamuk i wok long kamap bikpela ol kainkain sik nogut olsem STD na HIV/AIDS tu i wok long kamap bikpela tru.

Mista Tom i tok sapos i gat lo agensim pasin pamuk insait long kantri orait gavman i mas putim strongpela lo na mekim save long husat ol lain i save mekim ol dispela pasin.

Em i tok insait yet long ol setelmen sampela man i wok long yusim meri na pikirini long pasin pamuk long wanem ol i laik pulim mani long lukautim ol yet bikos laip insait long taun na siti i kamap hat tru bihain long prais bilong ol kaikai na kago samting i go antap tru.

Mista Tom i tok ol man husat i save wok mani tu i save mekim dispela pasin long wanem potnait ol i save kisim long i liklik tumas na i no inap long helpim famili bilong ol.

Tasol dispela i no gutpela eskus long wanem sapos ol dispela lain husat i no inap long painim isi laip i mas pasim kago bilong ol na i go bek long asples bilong ol we long gutpela pasin ol i ken yusim tupela han bilong ol long wokim gaden na sindaun gut long ples," Mista Tom i tok.

Em i tok nau yet ol komyuniti lida i wokim plen pinis long kamapim sampela strongpela komplek agensim pasin pamuk na ol i laikim Gavana Luther Wenge na Morobe Provinsal Gavman i mas givim ol ful sapot long karimaut dispela kempen wok.

SAUTEN REJON

Ol Laloki pipel singaut yet long helpim

KENNEDY EDENE i raitim

OL komiti na ol asples Koiari husat i stap klostu long Laloki na Goldie Wara husat kisim bagarap long hai wara las mun em ol wok long painim kaikai.

Namba olsem 500 na 800 pipel husat i bungim hevi em ol slip insait long Laloki veli em 17 Mail, Bluf-Inn, Furimuti viles, 14 Mail setelmen olgeta stap long Sogeri rot i go daun tu Laloki eria na hap i go long Goldie eria em setelmen long Goldie na tupela asples bilong Koiari, em Vesubewai, Agefa na Osabewai.

Em nau klostu wan mun na nogat gutpela o helpim saplai i kam long

Sentrel na Nesenel Gavman o i nogat ol gavman opisa ol kam na wokim sekap long ol bagarap we hai wara bin mekim.

Mista Songiom Babaga komuniti lida bilong Bluff-Inn setelmen tok, 4-pela ol haus em tait kisim i go.

Em tok, mipela stap long maus tru bilong Rouna we wara em i strong tru long hia, na mipela nogat taim long sevim planti samting bilong mipela.

Em tok tu, semtaim Elcom long Rouna bin opim wara na kwik taim wara levul go antap kwik tru.

Dispela em mekim na planti ol samting ol stap aninit long haus bilong ol na long graun em tait

wara bin kisim i go.

Planti ol kaikai gaden em tait wara bagarapim na tu karim i go.

Wara em klinim gut gaden bilong ol, nupela kaikai em mipela planim nau na bai i no inap redi hariap.

Kaikai em ol painim hat long kisim nau, i nogat kabis o gaden kaikai bai mipela salim long kisim mani na baim flawa na rais long lukautim ol pikinini na mipela long kaikai em i tok.

Planti bilong mipela i no save wok, mipela stap nating.

Long hapsait long Goldie, ol komyuniti na ol ples lain bungim wan kain samting tu. Tait wara kisim na bagarapim ol planti gaden kaikai bilong ol.

Planti ol gaden bilong ol em stap klostu long bikpela Goldie Wara na graun em gutpela long planim kaikai.

Tait wara i klinim gut olgeta gaden bilong ol klostu long wara.

Ol tok nau em nogat pumkin tips o kabis na banana long salim long baim flawa na rais bilong ol pikinini long kaikai.

Ol pipel tok nau bai ol ripotim long ol kaunsil o provinsal gavman.

Ol mas kam ol yet na lukim na mekim ripot. Ol mas noken sindaun long opis bilong ol na lukluk tasol, ol pipel i tok.

Ol pipel tok, sapos nogat mani ol mas lukluk o painim helpim long sampela hap.

Spika amamas long gutpela open de bilong palamen bung



• Nesenel palamen Spika Bernard Narokobi i wokabaut wantaim komanda bilong ol lain i mas igo long haus palamen las wik Tunde.

PAPUA Niugini em bikpela kantri na i nogat man. Dispela em toktok bilong wanpela Japan man we Spika bilong nesenel palamen Bernard Narokobi i tokaut long

en long Mande nait long dispela wik.

Mista Narokobi i tok sapos dispela Japan man i ting olsem, orait i nogat as long yumi i stilim samting bilong narapela man, mekim

ol raskol pasin na kain kain pasin we i brukim lo. Bikos sapos PNG em bikpela kantri na, i nogat man, i gat bikpela graun i stap bilong mekim wok long en.

Spika Narokobi i toktok long taim em i laik amamasim ol komiti na ol lain i go pas long kamapim bikpela pilai long Tunde las wik long opim bung bilong palamen long dispela yia 2000.

Mista Narokobi i tok amamas i go long ol ami, plis fos na CIS long go pas long mas, ol wokman bilong palamen long lukautim wanwan eria bilong wok, ol klina na draiva, ol elektrisen long stretim gut ol spika na pawa, ol lotu lain i bin kamap na singsing na ol lain i kamap makim wanwan provins bilong ol.

Hiri kaunsil brukim 2000 baset

HIRI Lokol Level Gavman kaunsil insait long Sentrel provins las wik pasim yia 2000 baset bilong ol.

Dispela baset miting em ol kisim long Kokoda Treil Motel long Sogeri ausait long Pot Mosbi. Long taim bilong tokaut long dispela K181,300 baset presiden bilong Hiri LLGC Mista Robert Nana tok, em i nau amamas bikos ol pasim baset.

Wanem samting em bin tingting tumas long em, em nau klia long rot na lukluk bilong em. Nau baset em ol apruvim na pasim, mi gat sampela bikpela samting long tingting em tok.

Mista Nana tok, mani em ol brukim kam long Nesenel Gavman olsem developmen gren em i no inap long yusim long olgeta wok bilong kaunsil. Em bilip bai kaunsil

bilong em bai wok wantaim long kamapim ol projek long wanem liklik mani ol i gat.

Long topim baset bilong em, em edukesen, helt, wara saplai, stretim ol rot, bris na waf.

Agrikalsa Marins na Fiseris tu em stap long top lis bilong em long mekim mani bilong ol rurel manmeri.

Long K181,3000 baset, K151,400 em ol

makim bilong developmen projeks na K29,900 em bilong staf grens.

Dispela K181,300 em kam long Nesenel Gavman olsem Nesenel Grens. Sait long baset miting, ol bin sindaun long pasim stendin oda bil, apointmen na anaunsmen long o lokol eksekutiv kaunsil na tu oraitim bai ileksen bilong kaunsil sit i stap nating bilong Mt Daimon.

Hiri kaunsil makim ol eksekutiv

HIRI Lokol Level Gavman Kaunsil insait long Sentrel provins las wik i tokaut long tokaut Lokol Eksekutiv Kaunsil bilong em.

Dispela apoinmen na em ol bin wokim long Kokoda Treil Motel antap long Sogeri ausait long Pot Mosbi siti.

Long dispela miting ol makim tu kaunsila Gadiki Rei bilong Kido Kaunsil Wod olsem vais presiden bilong Hiri Lokol Level Gavman Kaunsil (HLLGC).

Dispela 13 nupela lokol eksekutiv kaunsil ol makim em.

Robert Nana presiden, em holim Fainens Plening na Implementesin; Gadiki Rei vais presiden, Lokol Level Gavman na

Rifom; Gabriel Kepa Edukesin; Daroa Vada Helt; Francis Ragi agrikalsa; Lohia Vara Fiseris na Marin Risos; Lahui Bisia Lands na Envaironmen; Maraga Loa Komens na Industri; Lohia Bagagu Kalsa na Turism; Vincent Doki Forestri; Tom Lape Lo na Oda (Jastis); and Elizabeth Wamala Wimens na Yut na Hom Afeas.

Wamala em wanpela meri tasol em ol makim insait long ol 12-pela man eksekutiv presiden. Mista Nana tok, em bilip bai ol nupela kaunsil eksekutiv bai ol wok strong long wok bilong ol long kisim wanem samting ol i wok long en.

<p>Sunshine Liquid Milk 1 litre K1.50</p> <p>Roots Rice 1kg K1.27</p> <p>Bushells Tea Bags 25 K1.07</p> <p>Suncrush Cordial 750ml K1.81</p> <p>Ramu Sugar 1Kg K2.34</p> <p>Steelo Steel Wool 5 K1.18</p>		<p>Bluebird Sardines 425gr K 1.95</p> <p>Gold Nuggets 25gr K0.30</p> <p>Arrow Delta Choc. 150gr K1.25</p> <p>Globe Curry Chicken 300gr K2.70</p> <p>Weet Bix 375gr K3.90</p> <p>Mothers Choice Flour 1Kg K1.20</p>
--	--	--

Planti moa kaikai prais i go daun long en!

Ph: 325 7566, 325 0863 Fax: 325 7096

Tupela nes dai bihainim ambalens birua

RAYMOND PALANGAT i raitim

Tupela man i dai na sampela arapela i bin kisim bikipela bagarap na ol i stap long Kavieng haus sik bihainim wanpela birua long rot las wik.

Ol ripot i tok birua i bin kamap klostu long ples Kopkop ausait tasol long Kavieng taun long Nu

Ailan provins.

Ol lain i lukim birua i kamap i tok wanpela PMV i bin bamim ambalens we i wok long karim wanpela imejensi sikman long ples Lemakot jenerel haus sik.

Ripot i tok tupela nes we i wok long karim sikman i go long haus sik i dai na draiva i slip nau long haus sik wantaim bikipela bagarap we em i kisim long ka birua ya.

Plis ripot i tok ambalens ya i wok long givim siksti i go olsem long Kavieng na em bin yusim dabel lait signal na i no sairen taim em i bungim birua. Plis ripot i tok PMV we i wok long go pas i no bin givim spes long sait bilong ambalens we i wok long spit tumas long go long en.

Ripot i tok ambalens i bin bamim PMV na kapsait na kilim dai tupela nes.



• Ol sumatin bilong Salamaua Haikulu insait long Morobe provins i pulim ol bikman-meri long taim bilong opim faiv yia developmen bilong provins. Foto: Franco Nebas

Gahuku pipel kisim krismas presen



• Ol man na meri long bikples Kotuni i hamamas wan taim memba bilong ol Henry Smith bihain long em i bin skelim K70,000 kes mani na givim igo long ol Gahuku wan-pisin. Em givim tu sampela wokabaut somil masin. Foto: Sape Metta.

SAPÉ METTA i raitim

Long krismas bilong laspela yia i no bin i gat planti trabel na nois insait long Goroka, bik taun bilong Isten Hailans.

Tasol long ol haus lain arere long Goroka taun olsem Kafuku, Hobe, Gorohanota Nagamiza na bikipela viles haus lain long Kotuni, i bin i gat planti nois na bikipela pasin hama-

mas taim ol i bin kisim 3-pela nupela wokabaut somil na moa long K70,000 kes mani olsem krismas na niu yia presen em memba bilong Goroka, Henry Iyapo Smith i skelim na givim i go long ol viles pipel bilong Gahuku wan pisin eria.

Mista Smith i yusim Rurel Developmen fan bilong em long baim 5-pela wokabaut somil kos bilong ol em K44,000 long wan wan, 5-pela senso (chain saw)

na 6-pela kopi masin (pulper) na i bin givim i go long ol dispela pipel long Gahuku. Dispela ol haus lain em ol i stap insait long banis bilong ilektoret bilong en.

Moa long 30,000 pipel insait long dispela Gahuku eria bai i ken kisim bikipela helpim i kam long dispela ol wokabaut somil masin. Na em i namba wan taim stret long wanpela memba insait long Isten Hailans i givim kain masin long ol pipel bilong en.

Nakikus Konga risain long palamen



• Likot Kiare (raithan) i sanap wantaim Dominic Kahakoh long opening bilong palamen. Likot i wok 15 yia olgeta long haus palamen. Foto: Issac Ikuavi.

MEMBA bilong Gasel long Is Nu Briten provins Nakikus Konga i risain olsem memba bilong palamen long las wik Fraide.

Dispela toksave bilong em long em i laik risain i mekim kirap nogut long planti nesanel memba insait long palamen bung na ol i no inap bilip long dispela toksave bilong em hariap.

Long sotpela toksave bilong Mista Konga, em i tokaut olsem as em i risain long stap memba bilong Gasel em bikos ol brata na susa bilong em i dai na lusim ol pikinini bilong ol i kam bung long em nau. Namba bilong ol i olsem 21 pikinini olgeta na em i nogat inap taim tru long lukautim ol gut. Olsem na long dispela as, em i risain long go bek stap klostu long ol pikinini kandre bilong em na lukautim ol.

Palamen Spika Bernard Narokobi i tokaut olsem opis bilong em i sekim olgeta samting na ol wok wantaim Mista Konga tasol ol i no inap painim wanpela wok bilong birua o wok bilong pretim em o wanpela hevi nabaut. Ol i

skelim dispela eksen bilong Mista Konga olsem papa na lida tru husat i sanap strong long disisen bilong em na tingim hevi na laip bilong ol famili bilong em.

Ol komyuniti lida long Gasel i tokaut tu olsem ol i kirap nogut long harim dispela nius bikos ol i no bin kisim wanpela toksave long eksen Mista Konga i laik kisim.

Nakikus Konga i bin stap namba tu taim gen olsem memba bilong Gasel taim em i winim ileksen long 1992 na winim gen long 1997. Em i bin holim ol wok Minista olsem long Komes na arapela sinia wok tu long gavman.

Planti lida bilong palamen i tok Mista Konga em wanpela strongpela lida na i save pait strong long stretim hevi bilong kantri na tu stretim hevi bilong ol pipel bilong em long Gasel ilektoret long Is Nu Briten provins.

Sit bilong Gasel Open i stap nating nau na bai ileksen inap kamap sampela taim bihain.

Praivet bisnisman sanapim ol skul bilding long Westen provins

HELEN REI i raitim

WANPELA praivet bisnisman bilong Westen provins i wok long bidim ol klasrum na haus tisa projek bilong sampela skul insait long provins.

Nem bilong bisnisman ya em Roy Biama. Em i save karimaut ol kontrak wok. Em i stat pinis long bidim ol klasrum long Balimo na Biula Praimeri skul.

Projek i kostim K700,000 na Mista Biama i karimaut ol wok wantaim luksave olsemol bai peim em bihain taim ol skul i gat mani.

Kontrak kampani bilong Mista i sanapim pinis 14 haus tisa na tripela dabel klasrum long Balimo na tupela haus tisa na tripela dabel klasrum long Biula.

Mani bilong peim ol wok long ol klas-

rum bai i kam long ol skul fi, projek fi, provinsel gavman na ol dona ejensi.

Mista Biama i sanapim tu tripela haus slip bilong ol sumatin long Awaba apa sekonderi. Klostu taim ol haus slip bai i redi long ol sumatin long yusim. Mista Biama i bildim tu wanpela stoa long Awaba sekonderi we ol i save putim ol ais kaikai bilong skul mes.

Aninit long projek bilong wokim ol skul na tisa bilding. Ok Tedi Maining kampani i yusim Takis Kredit Skim long apgredim ol haus slip bilong ol sumatin, ol klasrum na ol, toilet samting bilong Daru Hai skul.

Ol i sanapim pinis 50 elementerri skul klasrum long Flai Riva eria na nau ol i wokim i stap moa klasrum bilong ol skul long Not, Saut na Midel Flai eria.



Banz paia long ragbi tas na baskebal resis

BANZ SPOT RIPOT

RAGBI Tas bilong Banz Rurel Spots Asosiesen (BRSA) i go insait long namba tu raun bilong em long las wiken.

Insait long dispela raun, ol tim i winim kompetisen bilong bai go insait long fainel na ol tim i no laik tumas bai hangamapim su bilong ol na traun gen neks yia.

Presiden bilong BRSA Joseph Enn i tok ragbi tas resis bilong ol man igat wanpela ten et (18) tim tasol top 10 tim tasol bai go insait long fainels resis.

Mista Enn i tok planti tim i stap klostu klostu na em i taim bilong ol long salim skin na brukim bun tru long traun abrusim narapela stap insait long top 10.

Planti bilong ol yangpela husat i wok long pilai tas i save pilai ragbi lig long Banz Ragbi Lig resis.

Ol strongpela ragbi lig lain hsuat i wok long lidim ol yangpela long pilai tas olgeta wiken Steve Yawi, Michael Wanpis, Thomsn

Arg, Sebastian Ariap, Kolip Kamben, Brian Kilanga, Tobias Pel, Kevin Noah, Peter Kop, Ngants na Albert Aris.

Kondineta bilong Spots Steven Sul i tok save nau i go long ol tim wantaim ol pilaia na sapota olsem klostu long taim bilong fainels kainkain hevi save kamap na em apil i long noken mekim dispela kain ol pasin nogut.

Em i tok olgeta i mas save olsem wanpela tim bai lus na narapela bai win, olsem na ol pilaia i mas kamapim gutpela pasin bilong spotsman na meri.

Insait long baskebal resis, presiden Gop Taia i tok olsem ol meri i wok long kilim indai stret skin bilong ol.

Em i tok tu olsem planti ol tim em famili tim we ol mama, susa na hauslain long wanwan liklik ples i putim tim na kamapim dispela kompetisen. Sampela taim ol i save pilai rap liklik na klostu tromoi han tasol bihain ol i save holim pas na sekhan gen na pilai.

Sampela ol mama olsem Kupulamb Enn, Lyn Michael, Roselyn Ka, Rebecca Klim na Jennifer Opali i go pas long ol yangpela long strongim dispela kompetisen.

Rebecca Klim na Jennifer Opali i save pilai strong na bosim kot i stap. Sampela tim mas was gut long ol dispela mama.

Long wankain taim yet presiden Enn i tok dispela ol gem i kamap long grasrut level na i no gat plan-ti mani long ranin asosesen na kisim sampela prais mani.

Em i apil long ol kampani na bisnisman, bikman long provinsal na nesanel gavman na wanwan lida insait long Banz Distrik long lukluk long dispela na sapotim ol wantaim mani.

Presiden Enn i tok wanem ol lain i ritim dispela stori na laik helpim i mas go stret long Elcom Praimeri Skul na bungim em wantaim ol opisel bilong em.

Soka 7-asait bai stat dispela wiken

GOROKA SOKA RIPOT

PLANTI ol soka sapota na sampela ol pilaia i no amamas tumas las wiken taim ol i go kamap long Nesanel Spot Institut na painimaut olsem nogat pilai bai kamap.

Sevan - asait kompetisen bilong Goroka Soka Asosiesen (GSA) i sapos long kamap las wiken i no kamap bikos planti tim i givim nem long stap insait long dispela resis. Dispela tasol i mekim na ol i surukim kompetisen i kam long dispela wiken.

Kea-teka presiden bilong GSA, Dimirit Mileng i tok olsem ol gem i no bin kamap bikos ol tim i no bin go na baim K50 nominesin fi bilong ol.

Mileng i tok sampela tim tasol i peim fi, tasol dispela namba bilong ol tim i no inap kamapim stret pul bilong ol tim long pilai long 7-asait kompetisen.

Em i tok tu olsem nau yet wanwan ol tim i wok long go lukim em na stat baim K50 nominesin fi.

Sampela ol dispela tim husat bai pilai em Guria, Murat, Morning Stars, Elcom, Kalibobo na Blu Kumuls.

Mileng i tok 4-pela tim bilong ol man na 2-pela tim bilong ol meri i redi pinis long pilai. Tasol em i tok ol lain hsuat i gat interes long putim wanpela tim i mas bungim tasol 12-pela pilaia na go peim K50 nominesin na pilai.

Goroka Soka Asosiesen i bin bungim kainkain ol hevi las yia taim ol tim i no bin peim ol rejistrin na nominesin fi bilong ol. Long dispela as tasol na kompetisen long las sisen i stap long mun Ogas.

Long dispela yia, GSA i laik statim kompetisen wantaim sevant-asait resis long traun kirapim interes namel long ol soka pilaia long Goroka.

Mileng i tok narapela hevi tim em long pilai graun. GSA i save yusim fil long NSI. Kos bilong yusim pilai graun long wanpela wiken em K50.

Dispela mani i save kam long ol nominesin fi em ol tim i peim.



• Susa long Lae i no isi long paitim bal taim Telikom i bungim Bismark las wiken.

Ol pilaia i no rejista yet

GOROKA Ragbi Lig Asosiesen (GRLA) bai i no inap larim prisisen kompetisen i go het inap olgeta pilaia i baim ful afiliesen na rejistresen bilong ol.

Lig edministreta Lawrence Acanufa i tokim Wantok olsem sisen bai i no inap stat inap olgeta pilaia stat long junia i go long sinia i baim olgeta disoela fi.

GOROKA LIG RIPOT

Em i tok kompetisen i no stat las wik bikos planti ol pilaia i no baim fi we i stapim pilai long stat.

Misat Acanufa i tok pilai i no nap stat yet inap olgeta junia na sinia pilaia i baim afiliesen fi bilong ol.

Em i apil long ol pilaia i mas kamap wantaim rejistresen fi bilong ol bipo long neks wiken (15/4/2000), bikos em i laik pilai i mas stat na ol lokel selektas i ken i gat sans long sindaun gut na lukluk na glasim gut ol pilaia bipo long ol i ken makim ol representativ pilaia bilong Goroka Lahanis inta-siti tim.

Goroka statim Isisen wantaim Nains resis

YAMES KAY i raitim

SEMPION Lig senta bilong Papua Niugini ragbi lig, Goroka bai statim isisen bilong en dispela wiken wantaim Nains kompetisen.

Dispela Nains kompetisen bai ron long tupela wiken. Edministreta em Papua Niugini Ragbi Futbol Lig (PNRFL) i makim long kontrolim Goroka lig, na loya, Lawrence Acanufa i bin tokaut long dispela.

Goroka lig em wanpela bilong ol senta em PNGRFL i bin saspenim bikos edministresin i no bin gat las yia.

Nau yet kea teka edministresin aninit long Mista Adanufa i traun hat tru long stretim ol wok na ol samting gut long kompetisen bilong dispela yia.

Las yia, Goroka Lahanis i bin sempion tim insait long SP Inta-siti kap kompetisen. Lahanis i bin rausim stret trausis bilong ol lain tobras Rabaul Guria 26-0 na winim SP Kap.

Dispela nains kompetisen long dispela wiken bai lukim ol tim bilong las yia i pilai. Dispela yia tu i lukim primia bilong las sisen Royals i senisim nem bilong en i go Zulu Knights. Narapela tim tu husat i

GOROKA LIG RIPOT

senisim nem bilong en dispela yia em Yunaited. Ol i senisim nem i go Wes.

Dispela tupela tim Royals na Yunaitet i bin bung long gren fainol las yia, we i lukim Royals i bin win. Dispela fainel long las yia i no bun kamap gut bikos pait i bin stat na pilai i stap namel tasol.

Ol tim husat bai pilai long Nains kompetisen em Brothers, Wests, Zulu Knights, Norths, Panthers na Hawks.

Planti ol kainkain toktok i bin kamap namel long ol ragbi lig sapota na ol manmeri long Goroka. taim ol i harim olsem PNGRFL i saspenim Goroka lig. Ol i ting olsem bai i nogat pilai na tu Goroka nogat sans long difenim SP Inta-siti kap ol i bin winim is yia.

Tasol nau yet edministresen bilong Acanufa i wok hat tru long stretim ol hevi na ronim gut edministresin bilong lig. Ol i katim gras na stretim ol eria insait long Danny Leahy ovel long statim long dispela wiken.

Ol lain long Goroka Eben Taun Atoriti i katim ol gras na redim ol ples pinis long pilai i stat.



IKEN WOKIM GUTPELA SAMTING LONG YU



• Hapbek bilong Magani Vagini Vagini i holim bal na redi long setim ol pilaia bilong em egensim Toyota Brothers long Pot Mosbi lig resis. Tupela tim i dro 20-20.



• Ol yangpela Anda 9 soka tim bilong St Peter i amamas bihain long ol i bekim gol bilong Ela Beach. Tasol amamas bilong ol i stap liklik taim tasol we Ela Beach i win 2-1.

• Raithan: Soka long Pot Mosbi i go insait long namba tu wik las wiken.

Ol poto: Issac Ikuavi



• Beta bilong Gazelle Resin Totil i redi long ran i go long namba wan bes tasol em i tingting planti tru ya.

• John Darren i hatim trening wantaim kosa Steve Tsivele bilong em i go long Australia las wik.

Holilen i amamas long wokabaut bilong Pop John Paul 2

Jerusalem:


WOKABAUT bilong hetman bilong Katolik Sios long wol Pop John Paul 2 i go long Holilen i bin go gupela tru na ol pipel long hap i amamas na luksave long en. Ol i luksave long daun pasin bilong em na laik bilong em long gupela sindaun i mas kamp bek long Midel Is.

Pasin we em bin holim wanpela refuji bilong Palestain long wokabaut bilong em na tu em bin askim long lusim tingting long ol rong we ol Kristen manmeri i bin wokim long bagarapim ol Jew.

Maski ol i luksave long Pop na wokabaut bilong em, ol Israel na Palestain pipel i painim hat tru long pogivim wanpela arapela.

Long Jerusalem we tupela pipel em ol Jew na ol Palestinien i save kolim olsem bikpela siti bilong ol, tupela sait i bin sanapim fleg bilong ol long Pop i luksave long ol. Tasol spirituel lida bilong wan bilien Katolik pipel long wol i no bin laik go insait long politikis bilong tupela grup. Tasol bipo em i lusim ol, em i givim luksave long tupela sait wantaim.

Pop John Paul i bin brukim skru na kisim graun long Palestain na tu sekanim na holim han bilong Yasser Arafat, lida bilong Palestain. Pop i luksave long Mista Arafat olsem lida na tu i soim sapot olsem ol Palestain pipel i gat rait long homlen.



• Pop John Paul 2 long pinis bilong wanpela wik wokabaut bilong em i putim wanpela preia mesej long "Wailing Wal bilong Jerusalem" em santu tru long ol ples tambu long hap.

Tasol Pop i bin blesim tu stet bilong ol Jews na go lukim presiden bilong Israel. Dispela i soim olsem em i autim opisel luksave bilong sios long lusim tingting long bilip na skul we sios i bin gat bipo long ol Jews olsem wokabaut raun wantaim nogat ples long stap pas long en i panisemen bilong God long ol bikos ol bin

kilim dai Jisas, Pikinini bilong em. Pop i bin visitim tu Westen Wal. em santu ples bilong bilip bilong lotu Juda na putim wanpela mesej i go insait long wol bilong askim God long lusim tingting long ol sin bilong ol kristen pipel. Em bin go tu long refuji kem bilong ol Palestain pipel em ol i kolim long Dheished we i gat

10,000 pipel i stap long en. Ples em i liklik tumas tasol planti pipel stret i paspas na i stap. Pop i bin tok hevi bilong ol Palestain pipel i mas pinis nau.

Long bung long Holokost Memoriel bilong Israel, Pop i luksave long sik milien Jews pipel we Nazi Gemeni i bin kilim dai ol. Sampela bilong ol em ol poroman bilong Pop taim ol i liklik bikos ol bin groap long ples bilong em wantaim ol long Polan.

Bikos Katolik Sios i no bin wokim wanpela samting o toktok long taim ol Nazi Gemeni i bagarapim na kilim ol Jew long Wol Wo 1, i bin save gat belkros long ol Jews i stap long Katolik Sios. Taim Pop i autim tok sori bilong sios na ol Kristen i go long Israel na ol Jews long ol rong na birua we ol Kristen i bin wokim, olgeta lain long Israel i bin soim amamas bilong ol.

Long Praim Minista Ehud Barak i go daun long ol grasrut, ol i luksave na amams long wokabaut bilong Pop olsem bikpela samting long histri bilong kantri, rijen na sios.

Jewis Rabai o pasto Ron Kronish i tok tu tausien krismas bilong belhevi nabelkros namel long ol Kristen na Jews i pinis. Em i samting bilong bipo.

Long sait bilong politikis, ol Palestain pipel i lukim olsem Pop i sapatim singaut bilong ol long Israel i mas lusim na gviim bek ol

graun we em (Israel) i bin kisim long taim bilong pait long 1967. Moa yet, ol i lukim Pop i gviim dispela sapot taim em i tok tupela sait i mas bihainim ol Yunaitet Nesen resolusen o ol samting we i laikim ol long mekim.

Planti Muslim lotu lain tu i bin pilim gupela bel taim Pop husat i bin stap nwmil long Misa lotu i stap isi long luksave long belo bilong preia bilong ol Muslim na bihain taim belo i pinis, em bin skruim Misa lot i go.

Long taim wanpela wik pilgrim o lotu wokabaut bilong Pop i pinis, ol Muslim na Jew i luksave long 79 krismas Pop na visita long dispela mak. Em long em i wokabaut wantai beksait i go daun na wokabaut wantaim diwai stik we em i yusim long sapatim em.

I bin gat ol mak long luksave we ol i kolim long "popmania" na wanpela long ol em wanpela televisen papet so we ol i kamapim long en long Israel long dispela taim bihainim wokabaut bilong Pop i go long Holilen. Papet so i soim ol kabinet memba bilong Presiden Barak i sanap lain i stap long Pop i harim konfesen long ol.

Long planti rot, wokabaut bilong Pop i bin brukim ol nupela graun long Holilen na kamapim planti gupela samting.

Wahid i tok Suharto i as long hevi long Aceh

Jakarta, Indonesia:

Presiden Abdurrahman Wahid bilong Indonesia i tok olpela dikteta lida Presiden Suharto i bin as long ol hevi, trabel na dai bilong planti pipel long Ach provins.

I gat ol ripot olsem Presiden Wahid bai i mekim wanpela wokabaut i go long Aceh

long dispela wiken Sande Epril 8.

Presiden Wahid long las yia yet i bin tok em bai givim moa pawa i go long Aceh provins tasol em bai i no inap long larim provins i bruk lusim Indonesia olgeta.

Ach i stap 1750 kilomita longwe long Jakarta na long las 25 krismas, ol paitman long provins i

wok long pait strong long bruk lus long Indonesia. Samting olsem 5,000 pipel we i gat insait tu long em ol amilain bilong Indonesia i dai pinis bihainim pait ya.

Presiden Wahid i tok Suharto i no bin mwkim gut long ol Aceh pipel na olsem hevi ya i kamap na go nogut.

Indonesia painim Is Timor militeri bos

Jakarta, Indonesia:

Plis long Indonesia i wok long painim Is Timor militeri lida Eurico Guterres na kwestenim em long pasin we em bin wokim long pairapim gan long wanpela ka long

Kupang, Wes Timor.

Ol ripot i tok wanpela independen wok painimaut bilong militeri bilong Indonesia i sutim tok long Mista Guterres olsem wanpela long ol

bikman husat i bin stap insait long ol samting bilong kamapim ol hevi long Is Timor long taim provins i bin karimaut independen vot long Ogas 30 las yia.

Rasia gat nupela lida

Rasia:

Vladimir Putin long dispela wik i winim sia olsem Presiden bilong Rasia insait long wanpela nesanel ileksen kantri i bin holim. Na em i bin winim bikpela mak long ol vot long ileksen.

Bikpela samting we Mista Putin bai wok long senisim na kampim gut

em long senisim gavman na ikonmik rifom program long kamapim sampela gupela samting bikos long dispela taim, wok mani o ikonomi bilong Rasia i bagarap tru.

Bipo long em i winim sia bilong lida bilong kantri, Mista Putin i bin wanpela strongpela

KGB ejen o spai bilong gavman bilong Rasia.

Taim em i kisim sia na ol tok amamas long ol arapela wol lida, Presiden Putin i no tokaut klia long polisi bilong em tasol em bin tok em bai sanap strong long Chenhnya i stap olsem hap bilong Rasia na i no bruk lus.

Diplomet bilong Australia dai long Maikronesia

Kenbera, Australia:

Wanpela diplomat bilong Australia i bin dai long Federetet Ste bilong Maikronesia long las wik.

Keria diplomet na fes sekeri Bruce Curley husat i gat 50 krismas i bin dai taim em i daiv wantaim sampela poroman

bilong em long las Sande long wanpela ailan we i stap klostu long solwara bilong biktaun bilong FSM, Pohnpei.

Arafat belhat long Israel

Midel is:

Lida bilong Palestain Presiden Yasser Arafat i sutim tok long Israel long i no hariapim ol toktok long kamapim gupela sindaun namel long ol we Yunaitet Stets i bin helpim long kamapim. Na em i tok sapos tupela sait i no kamap wantaim wanpela wanbel pasin na sainim agrimen long dispela, Palestain bai i diklerim Wes Beng na Gaza olsem independen stet.

Presiden Arafat i tok sampela bikman long Israel i wok long westim taim na dispela em laspela sans long pinisim ol samting we tupela grup i statim.

Presiden Arafat i bin autim dispela kain



• Lida Jasser Arafat i holim wanpela liklik bebi refuji bilong Palestain long Bayram festival long Wes Beirut taim pait namel long Israel na Palestain i bin stap hevi long yia 1982.

lain bilong Septemba Palestain i skruim ol 13 we ol bai sainim wok long painim det- pis triti namel long

Israel na Arab pipel.

Presiden bilong Amerika Bill Clinton i laikim stet tupela sait long sainim agrimen bipo taim bilong em olsem lida i pinis.

Olsem na em i laikim Syria na Israel tu i kirapim ol toktok na skruim i go gut. Na em bin bungim Presiden Hafed Assad bilong Syria long Jeneva, Swiselan long dispela wik tasol nogat gupela samting tumas i kamap bikos Syria i strong long Israel i mas senisim badamak namel long pait kantri. Bihainim 1967 Israel Arab pait, Israel i kisi sampela hap graun long bilong Syria i go insait long boda bilong mak bilong en.

Wokabaut bilong Kwin long Australia go gut tasol

Perth, Westen Australia:

Tripela wik wokabaut bilong Kwin Elizabeth 2 na man bilong em Prins Philip (o Duk ov Edinbra) long Australia i bin pinis long Sarere nait na tupela i bin lusim kantri long go bek long Ingran long las Sande.

Long Sarere nait, moa long 15.000 pipel i bin bung long Kings park long Pert, Westen Australia long stap insait long seremoni bilong tok gutbai long Kwin na Duke of Edinbra. Long dispela seremoni, Kwin i bin laitim Flame of Remembrance long Wo Memoriel Pak.

I bin gat ful militeri stail seremoni we Kwin i bin inspektim



• Kwin Elizabeth 2 na Duk ov Yok.

Royel gad ov Ona na RAAF balus i bin wokim flai ova wantaim 10-pela RAAF balus i bung wantaim long wokim stail bilong ol yet bilong tok gutbai long Kwin na Duk.

Kwin na man bilong em i bin putim ol flawa long wo memoriel na long pinisim seremoni, ami i bin wokim 21 gan salut long soim luksave long kwin.

Wokabaut i bin go gut tasol na i strongim gen tingting long kantri olsem Kwin i stap olsem het long Australia, maski i bin gat sampela liklik meknais long ol lain husat i no laikim Australia i stap aninit long Kwin tasol long kantri i kamap olsem wanpela ripablik.

Ol pipel protes egensim Suharto

Jakarta, Indonesia:

Raiot plis i bin paairim tiages long stapim ol pipel we i bin wok long tromoim ol ston i go long haus bilong Mista Suharto, foma presiden bilong Indonesia.

Hevi long dispela samting i bin stat long las wik taim pablik i les long pasin we foma presiden Suharto i wokim long i no harim askim bilong ol stet loya long kwestenim em long ol korap pasin we em bin mekim taim em i stap olsem lida bilong kantri abrusim 30 krismas.

Ol loya bilong Mista Suharto i tok em i gat sik no olsem em no inap long ol i kwestenim em. Tasol ol gavman dokta husat i bin sekim em i tok em i orait long ol i kwestenim em.

Ol protesta i wok long singaut olsem hangamapim Suharto taim ol i putim lain i go long strit we Mista Suharto na famili i stap long en. Na taim ol plis i tromoim tiages i go long oi, ol i sutim ol bek wantaim ol ston samting. Tupela pipel i bin kisim bagarap bihainim dispela protes mas.

Long sem de tu, samting olsem 500 sumatin na sampela woklain i bin karimaut wanpela protes mas tasol nogat bikpela hevi i kamap long en. Ol dispela protesta i bin protes bikos ol i behat long prais bilong pawa na pablik trenspot. Na tu pasin we gavman i laik apim prais bilong piul.

Gavman i wok long katim daun ol



• Foma lida bilong Indonesia moa long 30 krismas, Mista Suharto.

subsidi bikos long presa bilong ol intenesenel lain we i save givim mani helpim long Indonesia olsem Intenesenel Maniteri Fan (IMF) na Wol Beng.

IMF i wok long holim yet US\$400 milien we em bai givim long Indonesia bikos gavman i no mitim yet delain bilong em long ol samting we dispela intenesenel mani maket i laikim.

Laki bilong em i win gen.

London:

Sampela lain i bon laki ya!Yangpela man Ingran Paddy Spooner husat i wanpela raunman na i nogat wok long las wik i winim telivisen resis pilai long Briten wei klostu wankain olsem "Who

Wants to be a Millionaire" TV gem bilong Australia. Long pilai bilong las wik, em bin winim STG250,000 (A\$654,000).

Long las yia, man ya i bin winim rekot prais long A\$250,000 long Who Wants to

be a Millionaire. I bin gat planti tok kros taim em i win bikos planti lain Australia i no bin wanbel long ausait map long kisim prais.

Spooner husat i gat 33 krismas i bilong Hampshire long Ingran.

Tokelau pipel yet bai wokim disisen

Nu Silan:

Nu Silan bai i no inap long pusim tripela liklik ailan long Pasifik long kisim indipendens, Foren Minista Phil Goff i tok. Tripela ya em long Tokelau we nau yet i stap olsem teritori bilong Nu Silan. Tokelau i stap 480 kilomita longwe long Samoa na i gat 1,700 pipel long tripela liklik ailan. Tokelau i nogat haba (bris) long ol sip i pas long en, nogat ples balus na i no long taim i go pinis tasol em bin kisim namba wan telipon eksens bilong em. Samting olsem 5,000 Tokelau Ailan pipel i save stap long Nu Silan.

Ol ailan ya i stap long lista bilong Yunaitet Nesens Dikolonaisesen Komiti na dispela i semim ol bikman long Wellington we bai i gat planti toktok long futja bilong Tokelau.

Mista Goff i bin tok nupela gavman i laikim ol pipel bilong Tokelau i save olsem bihain taim bilong ol i stap long han bilong ol yet. Taim ol yet i tokaut long wanem politikel futja em Nu Silan bai givim.



• Foren Minista bilong Nu Silan, Phil Goff.

Ripot tok politiks na sindaun long Indonesia wok long kamap orait

Indonesia:

Ol ripot i tok politikel situesen long Is Timor i wok long kamap gutpela bihain long Presiden Abdurrahman Wahid i tekova long las yia.

Ripot i tok tru bihain long indipenden vot bilong Is Timor long Ogas 30,1999 we Yunaitet Nesens i bin sponsairim, planti pasin bilong bagarapim ol pipel i bin kamap.

Wanpela ripot bilong wol humen raits we Yunaitet Stets Stet Dipatmen i bin redim i tok long sait bilong

humen raits, ol samting i wok long kamap orait bihainim Presiden Wahid i tekova na Indonesia i gat namba wan demokretik gavman bihain long 32 krismas. Ripot i tok tu olsem politikel sistem i senis nau bihain long Presiden Wahid i tekova long BJHabibie.

Long wankain taim tu, Asosiesen bilong Sautis Esien Nesens (ASEAN) i nogat plen yet long mekim Is Timor i gat olsewa status long oge-naisesen bilong ol. Ripot i tok ol indipenden lida i

putim askim i go long ASEAN sapos ol i ken kamap olsem olsewa long oge-naisesen.

Ripot i tok ol memba i laikim Is Timor long redim ol yet pastaim bipo ol i wokim ol disisen long kisim ol.

Ripot i tok Is Tomor lida Ramos Horta husat i bin save tok egensim ASEAN long pastaim i bin tok Is Timor i laik stap insait long ol bung bilong ASEAN olsem olsewa na glasim na skelim ol samting bipo em i go insait long oge-naisesen ya

Maunten paia long Japan

Japan:

Moa long 11,000 pipel i bin ronawe long ol ples bilong ol long not Tokyo bikos maunten paia klostu long bilong bilong ol i pairap.

Ol ripot i tok Maunten Usu we i stap long not Tokyo long Hokaido Ailan i bin pairap

long las Fraide bihain long 20 yias we em bin stap isi. Long dispela samting we i bin kamap long las Fraide, maunten paia i bin tromoim ol ston, ges na asis bilong paia long olgeta kantri sait hap bilong not Japan we i save pulap long ais.

Tasol i no bin gat ol ripot long sampela lain i kisim birua long en.

Ripot i tok asis bilong paia i wok long pondaun pulap long wanpela raunwara na i barusim ol hap we i gat planti pipel long en.

LAIPSTAIL

Bilip long wanem samting yu laikim

JOE KANEKANE i raitim

WANPELA samting we planti ol lain long PNG i no save gut em olsem sapos yu putim tingting bilong yu long wanpela samting na yu sanap strong yu ken kisim dispela samting.

Long bisnis, politik, kisim digri, gutpela wok o kamap wanpela bikpela manmeri yu ken bihainim dispela kain pasin tasol i go na bai yu kisim dispela kain driman bilong yu.

I no long taim i go pinis mi bin bungim wanpela man husat i bin wet long pelataim tru long luk-save olsem driman bilong em i ken kamap tru. Mitupela i bin bung long wanpela stet kaikai minista bilong Foren Afeas bilong Australia i toktok. Dispela man em Dokta Jose Harnos Horta man husat i holim wok olsem mausman bilong ol pipel bilong Is Timor.


Nau yet taim ol pipel bilong Is Timor i wok long painim wanpela nupela presiden bilong kantri bilong ol planti lain i wok long ting olsem em wantaim narapela man Xanana Gusmao i strongpela lain i sanap long kisim dispela wok. Mista Gusmao i bin lida bilong ol lain husat i laikim independens long Indonesia.

Stori bilong Jose Harnos Horta i no wanpela gutpela stori long wanem em i bin kisim planti taim tru long lukim olsem Is Timor i kisim independens bilong em.

Tasol wanem samting i kamap long laip bilong em i gutpela piksa long ol pipel olsem sapos yu gat driman long wanpela samting na olgeta dei yu tingting strong long dispela driman, wanpela taim bai dispela i kamap tru.

"Sapos mi traim long putim ol hevi mi bin kisim long wokim dispela kain wok ating bai mi ken stori na stori i go igo. Tasol long lukim Is Timor i kisim independens bilong em mi ting olsem em wok bilong mi long wokim olsem," Mista Horta i tok.

Long wanpela bikpela konfrens long Sidney em i tok long wanem ol arapela hap bilong wol we ol lain olsem em husat i putim tingting bilong ol long wanpela samting bai save long wanem samting



• Joe Kanekane i bungim Dokta Jose Harnos Horta long wanpela stet dina long yunivesiti ol Sidney.

em i wok long toktok.

Mista Horta i tok planti taim em i no save kaikai gut, o kisim gutpela slip, ol nogat man i save laik toktok wantaim em o harim tingting bilong em tasol em i no lusim pait bilong em.

"Laip bilong em i wok bilong opim ai na tingting bilong ol pipel long wol olsem mipela long Is Timor i laikim independens long Indonesia. Em bin driman bilong mi long planti yia na wanpela yia i go pinis dispela i kamap," em i tok.

Mista Ramos Horta i bin winim Nobel pis prais wantaim Bisop Carlos Belo husat i holim wok olsem het bilong Katolik sios long Is Timor. Dispela em i prais we olgeta lain long wol i save givim i go long ol lain husat i save wok hat tru long kamapim bel isi pasin long wol.

Nogat wanpela narapela man long Indonesia i bin winim dispela kain prais na dispela tupela man i opim ai bilong olgeta bik lain long wol long dispela kain pasin bilong tupela.

Jose Ramos Horta i bilong Is Timor na bihain tasol long em i pinis mi yunivesiti em i wok olsem

wanpela niusman long Jakarta, biktaun bilong Indonesia. Long dispela taim em i wok long ol hevi we ol pipel bilong em i bungim na wanem samting i wok long kamap long ples bilong. Em i traim long yusim niuspela long kamapim long ples kliá dispela ol hevi tasol gavman bilong Indonesia i no wanbel long dispela.

Long yia 1974 gavman bilong Indonesia i rausim em long dispela kantri long wanem ol i no laikim dispela pasin em i wok long wokim long raitim kain pasin we ami bilong Indonesia i wokim.

Em i ronowei wantaim meri na pikinini bilong em i go long kantri Mozambique klostu long Saut Afrika. Meri bilong em i kisim wok olsem wanpela jas na em i stap yet long dispela hap wantaim pikinini man bilong tupela.

Mista Horta i bin holim wok olsem man i go pas long Pablik Afeas long Embesi bilong Mozambique long Washington, biktaun bilong Amerika.

Long dispela taim em i go skul long nait long surukim save bilong em na tu opim ai bilong wm long bungim ol biklain husat em i ting i ken halivim ol pipel

bilong em long Is Timor.

Em i bungim sampela biklain long haus palamen bilong Amerika ol i kolim senet na em i givim tingting bilong em i go long dispela tingting bilong Is Timor.

Em i lusim dispela wok na bihain em i kam bek long Austrelia long wanem em i klostu long Indonesia na em i pilim olsem sapos em i stap klostu long ples em i ken pait long rait bilong pipel bilong em.

Insait long 27 yia olgeta Jose Ramos Horta i go long ol Kibung, semina, kantri, ples yunivesiti we em i toktok long tingting bilong Is Timor.

Wanpela yunivesti long Amerika i givim taitel olsem Dokta long wok em i wokim long surukim tingting bilong ol pipel bilong Is Timor.

Las yia taim Indonesia gavman i tok orait long referendim (tingting bilong olgeta pipel) tingting bilong Mista Horta i kalap long wanem em i save dispela rot i bai halivim ol pipel long autim tingting bilong ol.

I no long taim pait i bruk tasol bikpela samting em ol pipel bilong Is Timor i autim tingting

bilong ol olsem ol i no laik stap klostu long Indonesia moa.

Long sem taim tu Xanana Gusmao tu ol i lusim em long kalabus long wanem em i egensim gavman bilong Indonesia.

Mista Ramos Horta i save olsem dispela driman long 27 yia i no go nating na wok em i wokim long olgeta yia i karim kaikai.

Olsem baibel i save tok wanem samting yu wokim em bai kam bek long yu, na tingting bilong dispela tupela man i olsem.

Yumi lukim stori bilong ol lain olsem Marin Luther King husat pait long raits bilong ol blak pipel bilong Amerika, o Nelson Mandela we wait gavman bilong Saut Afrika i kalabusim em inap long 27 yia olgeta.

Dispela em ol man we ol i gat bilip olsem wanpela taim bai driman bilong ol i kamap tru na stret we dispela i kamap long ples kliá.

Long ol gem yumi lukim tim Melbourne Storm husat i kamap nau tasol long NRL resis tasol ol i autim tiket bilong olgeta tim na ol i kamap nambawan long resis.

Marcus Bai wanpela strongpela pilaia i kamap long dispela tim tu na em tu i soim olsem planti taim ol narapela pilaia i save laik traim long stap insait ol i no save kisim sans tasol em i soim olsem mipela i ken wokim.

Stori bilong ol lain olsem Nelson Mandela, Martin Luther King, Jose Ramos Horta i gutpela long planti lain bilong mipela husat i save laik lukim ol samting i kamap hariap. Yumi laik tru long stap insait long wanpela hap we ol i gutpela, nogat pait na plenti samting i stap long ples kliá.

Ating dispela i wokim yumi les na mipela i save weitim ol narapela lain long kam na wokim samtin bilong mipela na mipela i no kirapim tingting long wokim ol samting mipela yet. Laip i stap long han bilong mipela sapos mipela no yusim gut bai mipela i bungim planti hevi na em i ken bagarapim sindaun bilong mipela. Tasol sapos mipela i laikim wanpela samting nogut tru mipela i mas redi long wok hat, kisim taim na sampela taim wet longpela taim. Dispela em as bilong laip, na i no bilong wokim samting we ol narapela lain i wokim.

Lapun meri Morobe go bek long asples

MASTA WAI i raitim

TAIM yu lusim asples bilong yu longpela taim, bai yu wari na tingim ol papamama, kandre, brata susa na ol famili lain bilong yu. Na tu bai yu tingim ol gaden na wara na ol samting yu save mekim bipo long graun bilong yu. Na bai tingting bilong yu inap kirap long yu laik go bek long asples bilong yu wanpela taim.

Wanpela lapun meri Morobe i bin marit long Sentrel provins na i go stap long asples bilong man bilong em klostu 15 krismas olgeta. Em i bin go stap long ples

bilong em taim em i marit nupela na i gat tripela pikinini. Tasol long 1978, em wantaim man bilong em na ol tripela pikinini i go bek long asples bilong em long Morobe provins. Taim ol i stap long ples bilong em, em i gat narapela tripela pikinini man. Long 1989 man bilong em i lapun long asples bilong Morobe olsem na em i kisim ol famili na ol i go bek long Sentrel provins long asples bilong em yet. Meri Morobe i go wantaim man bilong em na ol pikinini na i stap olsem wanpela mama bilong ples long Sentrel provins inap man bilong em i dai long 1990.

Lapun meri i werim blakpela

kolos na laplap long 1990 i kam inap dispela yia 2000 we em i gat laik long go bek long asples bilong em.

Lapun meri Morobe ya i tokim ol pikinini bilong em olsem e i laik go bek long ples bilong em bikos em i pilim olsem em i nogat graun long Sentrel provins bikos man bilong em i dai pinis na em yet i nogat strong moa long toktok long ol samting bilong gaden o graun. Em i mas kisim strong tasol long ol bikpela pikinini bilong em husat i marit long asples bilong papa bilong ol na i stap.

Bikpela pikinini man bilong em i no marit long asples bilong papa. Tasol em i bikpela long ples bilong papa na kisim meri bilong em i kam na ol i stap. Tupela pikinini meri bilong meri Morobe ya i marit na i gat famili na stap wantaim man bilong tupela long ples. Na ol i save was long mama bilong ol long kaikai na gaden. Narapela foa pikinini man bilong lapun meri i marit long asples bilong papa bilong em na i wok long sapotim tu mama bilong em.

Tasol tripela liklik pikinini man i kamap bikpela boi na ol i wok long glasim na skelim tu olsem mama bilong ol tripela i no kisim gutpela sapot na helpim tumas. Ol i painimaut olsem mama bilong ol i bilong narapela provins na i nogat graun long hap. Ol i painimaut tu olsem sapos papa i stap

laip yet, ating bai mama i gat strong na sapot long mekim ol wok na ol samting long ples. Dispela wari bilong tripela liklik pikinini boi i strongim tingting bilong mama long kisim ol tripela yangpela pikinini na go bek long asples bilong em. Maski ol foapela bikpela pikinini i marit na stap long ples bilong papa bilong ol, tripela manki ya i mas sindaun antap tu long graun bilong mama stret.

Lapun meri Morobe ya i gat planti lain famili tu i stap long ples bilong em. Maski ol blut brata na susa bilong em i lapun pinis na i dai, ol pikinini man na meri i stap yet long ples. Ol dispela kandre bilong em i save wari na toktok planti tu long dispela mama bilong ol i mas go bek long asples bikos papa i dai longpela taim pinis na mama i lapun pinis na em i mas go bek stap liklik wantaim ol. Bikos ol susa na brata bilong em i lus pinis.


Long Februari dispela yia tasol, dispela strongpela tingting bilong mama na tripelea pikinini boi bilong em i go wankain long laik bilong ol famili long asples long Morobe. Olsem na ol i salim tok-save i go kam na balus tiket i dai na mama i kisim tripela pikinini boi na ol i kalap long Air Niugini blus long las mun na go pinis long Morobe provins.

Long ples balus, tupela pikinini

meri na brata bilong tupela i krai nogut tru long lukim mama i lusim ol wantaim tripela brata bilong ol long i go long ples bilong mama. Ol i tok bai sampela taim ol bai i go lukim ol na kam bek. Tripela yangpela boi ya i tokim tu tupela susa na brata bilong ol olsem sampela taim bai ol i kisim balus i kam lukim ol na go bek.

Dispela stori i wankain long planti lain we ol i save lusim asples bilong ol longpela taim tasol bihain wanpela taim bai ol i go kamap soim pes gen. Na olgeta manmeri long ples bai kirap nogut. Maski man bilong yu i no dai o meri bilong yu ino dai, tasol wanpela taim bai yu soim pes yet long ples. Asples em i olsem bun na strong bilong yu bikos olgeta strong na pawa bilong yu em yu kisim long asples wantaim mama-papa na bihain yu kamap bikpela manmeri na marit na gat famili na go stap long narapela hap.

Dispela lapun meri Morobe bai i go bek sampela taim long Sentrel provins long lukim tupela pikinini meri na tupela pikinini man na ol tumbuna bilong em long bihain taim o nogat?. Nogut em i lapun na strong bilong raun i pinis na em bai sindaun tasol na lukluk kam ausait long dua bilong haus na traim lukim rot na tingim, bai ol pikinini na tumbuna long Sentrel provins bai kam lukim mi sampela taim o nogat?.



Nupela albam bilong "Potts" i kam aut

RAYMOND PALANGAT i raitim

Gutpela nius i kamaut pinis long ol man husat i save laikim tru lokel musik, king bilong Pasifik musik. Patti "Potts" Doi i kam bek nau na em strong moa wantaim nupela solo albam bilong em.

Pasifik Gol Studios i tokaut long dispela wik olsem ol bai lonsim nupela albam bilong Pati Doi long Fraide long Pot Mosbi

Dispela albam bai namba tu solo albam bilong em. Namba wan bilong em i bin kamaut long 1998 na faipela singsing bilong em long dispela albam i bin kamap namba wan.

Dispela nupela albam bilong em ba stap long kaset na CD.

Planti long ol singsing long dispela albam em Patti yet i bin komposim.

Em i raitim tu wanpela singsing long sempion ragbi lig pilaia, na winga bilong Melbourne Storms Marcus Bai husat i save laikim tru musik bilong Patti na i wanpela poroman bilong em.

I gat wanpela singsing tu bilong Nau FM we em i mekim sampela rep musik wantaim ol DJ bilong Nau FM.


Patti i gat nem pinis long Pasifik long taim em wantaim ben bilong em Quakes i bin raun long New Caledonia, Vanuatu na Solomon Island.

Planti long ol singsing long namba wan albam bilong em ol lain bilong Pasifik i save laikim stret na i gat bilip olsem dispela namba tu albam bilong em bai mekim ol manmeri i laikim musik bilong em moa yet.

Long ol arapela nius Patti wantaim sampela arapela lain bilong PGS bai go long Darwin, Ostrelia na bai stap faiv-pela wik we ol bai mekim wanpela musik so wantaim ol arapela atis musik lain long hap.

Ol arapela PNG lain husat bai go wantaim em i drama bilong Yothi Yindi, Ben Hakaliz na Richard Mogu husat i bes gitarist bilong Feedback ben.





Tupela yangpela abrusim taim nogut



BIPO BIPO long wanpela ples ol kolim Kumbra insait long Komba klostu long Indagen ol tumbuna i bin stap long en. Ol save lotuim giaman God olsem ol sapim diwai sna anapim i stap.

Taim bilong kilim pik ol bai rausim olgeta meri pikinini i go nabaut long bus long tupela o tripela wiks. Insait long dispela taim, ol yangpela man o meri mama i no inap bai lukim ol man bikos i gat bikpela ol bilong ol. Dispela em lo bilong ol i stap.

Taim ol kilim pik ol save tok oltaim olsem tewel i kaikai pik. Taim ol i tok ol bai bugim ol pik na go aninit long diwai na pulim rop na singautim ol tewel long go kaikaim pik. Mekim olsem na ol yet i save kaikaim ol dispela pik na pinisim ol yet.

Wanpela taim wankain pasin bilong kilim pik na kaikai i kamap na tupela man na meri i marit nupela na i stap. Ol meri pikinini i pret na hait nabaut insait long bus.

Wanpela pikinini meri bilong em i hangere na tupela i go painim kaikai long gaden.

Tupela i hariap long painim kaikai i stap na kwiktaim, tewel bilong ol i stap bikos kwiktaim tewel bilong ol man i kaikai pik i singautim meri olsem, Mutura Mutura em nem bilong meri we i wok long painim ol kaikai long gaden.

Mutura i kirap na putim ai i go long ol man. Taim em lukluk i go long ol man sem taim em i lukim olsem skai na ol hap bus i blak olgeta. I no longtaim nau na antap graun long maunten ol kolim Lambu Sogera na Kirin Upusenga na Gave planzit bruk na i biruaim ol man. Ston na tait wara i wok long karamapim ol manmeri na pin-

isim ol insait long dispela ples yet.

Bikela birua i kamap tupela marit taim ol i wokabaut yet bikos tait i kam na karamapim tupela.

Tupela i stap insait long baret inap nait na i go tulait. Tupela i kirap long birua na kamaut na stat wokabaut i go kamap long

Konge tasol samting i no pinis. Ol iwokabaut i go long Goama Wara na ting tupela i

stap gut tasol samting i no pinis. Tupela brukim bus long Saravaga na i go kamap long Waing.

Taim tupela kamap long Waing tupela pilim olsem i gut-pela long i stap na tupela i stap.

Tupela i stap na kamapim ol pikinini nau ol save kolim ol yet Kumbara. Nau planti pikinini Kumbara planti kamap insait long Waing.

Na i kamapim ol bikman pikinini bilong Kambum Komba i stap long palamen na gavman bilong Morobe.



Nem: Spandix Gabriel
Krismas: 20 (man)
Adres: Catholic Mission, P. O Box Kundiawa, Simbu Province.
Save laikim: Raun long ol nambis ples na pilai basketbal.

Nem: Noelyn Singut
Krismas: 15 (meri)
Adres: Kreer Primay School, P.O. Box 502, Wewak, East New Britain.
Save laikim: Pilai spot, tok pilai na harim stori bilong arapela pen pren.

Nem: Stella Mora
Krismas: 16 (meri)
Adres: Kreer Primary School, P.O. Box 502, Wewak, East Sepik Province.
Save laikim: Pilai spot, mekim pren wankain ol narapela na raitim leta.

Nem: Belden Ti Jimmy
Krismas: 16 (man)
Adres: Tawa Roots Village, Tu Molbul Base Camp, Tumolbil, Telefomim, Distrik, Sandaun Province.

Nem: Rose Lucas
Krismas: 17 (meri)
Adres: Sarakolok Primary School, P.O. Box 617, Kimbe, WNBP.
Save laikim: Pilai volibal, netbal, mekim pen pren na harim musik.

Nem: Primus Jokit
Krismas: 25 (man)
Adres: Monfort Primary School, lawara East Awin Camp, Kiunga, Western Province.
Save laikim: Pilai volibal, raitim leta long pen pren ng senisim poto.

Nem: Emanuel Toknem
Krismas: 25 (man)
Adres: P.O. Box 151, South Morfort Primary School, lowara East Awin Camp, Kiunga, Western Province.
Save laikim: Kukim kaikai, pilai volibal, soka, raitim leta long narapela provins na mekim pren.

Nem: Alousius Tayuk Bin
Krismas: 24 (man)
Adres: P.O. Box 151, North Monfort, Primary School, lowara East Awin Camp.
Save laikim: Meim pren long narapela provins, raitim leta long ol man na meri i rait i kam long mi.

Nem: Linus Okopka
Krismas: 25 (man)
Adres: P.O. Box 151, North Manfort Primary School lowara East Awin Camp.
Save laikim: Mekim pren wantaim narapela provins man o meri husat manmeri i bekim wantaim leta na poto.

Nem: Billy Undah
Krismas: 18 (man)
Adres: Fletcher Morobe Construction, Joneiry/Work Shop, P.O. Box 848. Port Moresby, NCD, PNG.
Save laikim: Pren wantaim ol narapela manmeri long provins. Raitim pas i go i kam, go lotu na harim ol lokal musik. Senisim poto i go i kam long ol poroman long narapela provins.

Nem: Mathew Willie
Krismas: 16 (man)
Adres: C/ - ESP Erave, P.O. Box 220, Mendi SHP.
Save laikim: Pilai ragbi tas, pilai basketbal, volibal na harim ol pop musi.

Nem: Peter K. Stick
Krismas: 17 (man)
Adres: C/ - ESP Erave, P.O. Box 220, Mendi SHP.
Save laikim: Laik long danis wantaim pren bilong mi, harim ol pop musik na raitim pas.

Nem: Cecilia Barubi
Krismas: 17 (meri)
Adres: C/ - ESP Erave, P.O. Box 220, Mendi SHP.
Save laikim: Pilai basketbal, volibal, harim pop musik, danis na raitim lav leta.

Mi wari long kisim sik HIV/AIDS



Dia Laiplain
Mi laikim sampela infomesen long sik HIV/AIDS.

Mi gat tripela gelpren na mi laikim olgeta tripela yet na mi save slip wantaim ol.

Plen bilong mi em long maritim husat i gat bel pastaim. Tasol mi wari nogut mi kisim sik AIDS sapos mi slip wantaim planti meri. Inap yupela i helpim mi?

RISKY

Dia Pren
Bikpela samting we bai yu mas save long en em sapos yu

slip wantaim man o meri husat i gat sik HIV we i save i skruim i go long sik AIDS (Acquired Immune-deficiency Syndrome), bai yu kisim sik nogut yet. Maski yu yusim kondom, yu inap long bungim sik ya sapos kondom i no wok olsem i save kamap long sampela taim.

Yu mas harim pinis olsem i nogat marasin long daunim sik AIDS. Man o meri i gat sik AIDS em bai ino inap long stap longpela taim, nogat. Em bai dai hariap o bihain long sampela yia. Bihain long sampela wik na yu go long sekap, blut bilong yu bai soim olsem yu gat dispela sik, tasol yu no inap long lukim sampela mak olsem yu gat dispela sik long sampela krismas.

AIDS i wanpela long ol STD sik we wanpela man i gat i ken givim long narapela. Rot we narapela man i save kisim em sapos ol man meri i slip wantaim planti patna. Sapos wanpela long ol gelpren bilong yu i

slip wantaim narapela man, em i ken kisim sik HIV o AIDS o sampela arapela sik STD olsem gonoria, sifilis na moa. Na yu ken kisim sik ya long en. Pasin we yu wokim long slip wantaim planti lain i putim yu long hevi we bai yu kisim ol kain sik. Sampela ol sik STD bai i wokim yu na yu no inap long gat pikinini. I gutpela sapos yu go go long sekap long haus sik bikos nogut yu no inap long gat pikinini.

Mipela i wari long pasin bilong yu long ol meri, pasin bilong slip wantaim ol na tingting bilong yu long marit. yu tok yu laikim tripela meri ya tasol yu tok bai yu maritim husat long ol i gat bel pastaim. I luk olsem yu ting olsem marit em i samting nating na yu laik amamasim yu yet.

I luk olsem tu yu no wari long stap gut long marit wantaim wanpela patna. Ol gelpren bilong yu i save long pien bilong

yu? Ol wok long laik karim bel? Wan wan i save tu olsem yu wok long slip wantaim olgeta long ol o yu wok long wokim hait na yu giamanim ol tasol? Bai yu wokim wanem samting sapos tripela wantaim i gat bel?

I luk olsem yu wanpela selpis man na yu no wari long ol. I luk olsem yu no wari long yu yet na sapos yu kisim sik HIV/AIDS. Wankain tu long ol meri. Yu ken kisim pinis tu AIDS long wanpela na yu ken givim long ol narapela.

Sapos tru tru yu laikim ol meri ya, bai yu no inap long laikim dispela samting long kamap long ol. na yu no inap long pilaipilai na slip wantaim olgeta. Long sampela kantri, ol save sekim ol yangpela long sik HIV/AIDS bipo long ol i marit.


Mipela i gat bikpela tingting olsem yu bai skelim na glasim ol tingting na noken slip wantaim meri inap yu marit.

Laiplain



• Antap: Ol meri long Mosbi selebretim Intanesenel De bilong ol meri wantaim stail.

• Wanpela lida man long Kafuku i kisim kes mani long memba Henry Smith. Foto: Sape Metta.



• Tupela studen ya Charles Ofoi na Laura Wawun i bin ritim toktok bilong ol yut makim PNG yut i go long ol lida bilong nesenel palamen.



• (Raithan) Mao Zeming wantaim Praitim Minista Sir Mekere Morauta i sanap wantaim ol nesenel lida na bikman bilong Saina long opim Umi bris long las wik Fraide.



• Lephan: Ol ami long Pot Mosbi i holim bikpela mas long las wik Tunde long opim palamen bung bilong disepela yia 2000.

• Aninit: Ol lain wanpisin bilong Barnabas Paraka husat i bin dai long wanpela birua long rot long Gororka i go kra i long ples singsing bilong ol.



KANAGE



• I kam long pes 25

yupela save pinis ya na, yupela i ken igo autait na go olgeta long ples bilong yupela. Lotu bilong yumi i pinis nau. Tasol samting tru em ino autim tok long ol. Tupela wik Sande ol kongriyosen igo kam nating tru na pilim nogut na kisim kainkain tingting taim ol i wok-abaut.

Joe Blow S. Kundiawa

Kanage bilong Sepik. Em wok olsem long Lake Kapiago distrik opis insait long Sauten Hailians Provins. Kanage prenim wanpela meri Hakini. Wanpela fotnait Fraide preni meri tokim Kanage i kam raun tasol long mun pilai long nait. Tasol manki Sepik em ino save long mining bilong mun pilai, olsem na kanage dring spak tulait long Koya Kuria klab. Long moning Kanage ai ret wantaim raun long Lake Kapiago maket.

Long geit stret ai bilong manki Sepik i pas long nil kapok bilong Hailians. Tasol meri ya i lap tasol tokim Kanage olsem, meri Lake Kapiago mipela ino save long tok gjaman. Manki Sepik yu save tok yu man bilong kilim pukpuk long

mun lait em yu wokim maus wara long mi ya. Mi ting tru olsem na mi tokim yu ikam long mun. Nau em yu nogat moa sans. Sanis bilong yu em pinis long aste nau em nupela de bilong mi long painim nupela man. Trangu Kanage belhat nogut tru long ol Sepik preni bilong em

Apisa Ole Lake Kapiago

yet na em karim igo long papa bilong em na askim em. Tambu bilong yu salim yu kam long lain level? Papa bilong em tok, yes ya tambu salim mi kam long kisim lain namel ya. Em kisim siksti igo bek long wok. Apinun tupela pinis wok i kam bek Misis Kanage stori long Kanage na tupela kilim skin long lap.

John G Kera Badili POM

Wanpela taim Kanage i stap long Aseki na em i askim ol man long Aseki long go long Menyamy. Ol man i soim rot i go long Menyamy pinis. Kanage i wokabaut i go antap long kol maunten na malolo na semtaim em i hangre nogut tru. Kanage i kirap isi tasol na wokabaut i go daun long Sikong. Taim em kamap long Sikong em kaikai skon. Kanage i hangre yet em ino pulap. Em i wokabaut i go daun long Pinake.

Na taim em kam long Pinake em i kaikai pinat. Em i kaikai na pulap. Na dispela taim Kanage i painim wara tu long waswas. Taim em igo na kamap long Pispon em i waswas. Em i wokabaut yet igo moa yet na kamap long Ami.

Taim em kamap long Ami em i werim Ami siet na Ami trausis. Em i wokabaut igo moa yet na igo kamap long zipa. Taim em kamap long zipa, zipa bilong trausis bilong Kanage i lus igo daun.

Betty Tainas Bulolo

Kanage em wanpela singel papa. Na Kanage tu em strong-pela paps ya. Na paps Kanage digim kaukau i go maket long Lae.

Na paps Kanage em i kam long Lae maket paps Kanage em amamas nogut tru bikos nogat kaukau long maket.

Na em maketim kaukau bilong em na i no isi long rekim ol mani long kaukau em i kisim 20 kina, 10 kina, 5 kina o 2 kina tasol. Em i foldim mani bilong em gut tru na suvim i go insait long masis boks.

Na paps Kanage turangu pekpek i kilim em tru na dastim igo insait long toilet.

Paps Kanage putim trausis igo daun long skru bilong em na pekpek istap. Wanpela 2 kina meri kam soim anda kout na Kanage kalap na tok u-u wet mi-i pekipeki long yu-u bihain logo mi ya.

Na 2 kina meri i kam holim pas long paps Kanage na kisim liklik masis boks paus bilong Kanage na tekov.

Dereke Goroka

Kanage em bilong K.4.9 Kuka long Goroka na bro bilong em long Sankamap long Buka tupela save pas gut na raun.

Na tupela i save raun na tupela i save putim skin long wanpela marit meri. Na tupela save daunim bikpela spet na long apinun long taim olsem long (6pm) tupela igo wet long haus bilong em.

Na man bilong en tekov long wok nait na tupela wet i stap i go 10 kilok na kanage i laik go insait long haus na tokim em olsem. Yu bilak ya na mi no inap lukim yu.

Yu mas opim lips bilong yu na bai mi ken lukim yu. Kanage igo insait long windo meri ya opim lait na slip pinis.

Na Kanage putim han igo i kam em long bat rum em holim na

skuisim traipela mama bilong pekpek em nogat samting long klinim na givim siksti i go autsait klinim long bus i go na bro bilong em opim maus bilong em gut istap na em ting wait pepa na Kanage klinim antap long tit bilong em. Buka smelim na givim gut wan long Kanage. Kanage pundaun i stap na Buka tekov.

Drex Gamuso Goroka

Kanage i save stap long Kimi. Em bin feilim grade six (6) bilong, em long Kimi komuniti skul na save planim kaukau long ples na stap.

Tasol bikpela brata bilong em bin pasim grade 6 na go long grade 10 na winim scholarship long go long Australia.

Em skul gut igo na em igo kamap wanpela bikman. Em tingim Kanage gen na sore long em na baim tiket bilong em long go stap wantaim em long Australia.

Kanage tu i kamap bikpela man tu na gat longpela mausgras. Long Australia Kanage i save go lukim ol waitman i pilai takol. Wanpela taim ol waitman i save pilai takol ya i sot long ol mangi ol singautim Kanage long go helpim ol.

Kanage igo helpim na pilai fowet bilong ol.

Em kisim bai na siksti igo na ol holim strong long mausgras bilong em na em singaut olsem: "My mausgras, my mausgras." Ol waitman ino harim save English bilong em na ol holim strong yet na em go autsait long fil na ino kam bek.

Lore Tunuto Goroka.






PABLIK NOTIS

I GO LONG OLGETA KOFI GROA NA OL PROSESA

TAMBU TRU LONG BAIM NA SALIM SERI KOFI INSAIT LONG OL HAILANS PROVINS

1. Lo we I stopim bisnis bilong baim na salim seri kopi insait long olgeta Hailans provins em CIC Bod ov dairektas I kamapim long mun mas 1997 I stap strong yet.
2. Wanpela Apil I go long olgeta lain husat lukautim wok bilong lo olsem polis, viles-kot, kausila na ol gutpela manmeri insait long kantri long halivim na bihainim dispela lo.
3. Olgeta prosesa husat I rejista I mas bihainim dispela lo we I stap long setifiket bilong rejistresin na halivim long karimaut dispela lo. CIC bai rausim laisens bilong ol prosesa husat I brukim dispela lo.
4. Provisen aninit long CIC Ekt, Seksin 21 na 22 I sasim K1,000 fain o 6-mun kalabus long ol lain husat I brukim dispela lo. Ol lain insait long wok io I ken yusim dispela provisen long sasim ol lain husat I brukim lo. Sapos yu laikim moa toksave long dispela orait yu ken ringin ol CIC kofi inspekta long telefon namba. 732-1266 o dairek lain long 732-2466.
5. Ol CIC namba-plet bilong kar nau mipela I salim long K100. Olgeta rejista prosesa I mas baim dispela namba-plet long karim kofi long ples ol kism kofi long en I go long fektori. CIC bai redim ol han-palpa masin long ol lain we dispela lo bilong stopim seri kofi I kamap. Ol palpa I stap pinis na I redi long salim long liklik prais. Long moa toksave, yu ken ringing ol provinsal kofi kodineta long ol wan wan Hailans senta.
6. Pasin bilong stilim kofi em I wanpela kriminal ofens na ol lain husat I brukim bai go long han bilong polis na ol lain bilong lo na I ken kism sas aninit long kriminal kod ekt.
7. Kofi indastri koporesen (CIC) lkampaim dispela senis long lo bilong baim na salim seri kopi long was long ol kofi groa insait long ol viles level.

BADIRA VARI
SIF EXECUTIV OFISA



DO YOU WANT TO BE A

COMPUTER PROFESSIONAL?

Your First Step is



**WORKERS MUTUAL
COMPUTER SERVICES
(PNG) LTD.**

Suite 7C, First Floor, Garden City, Boroko.
Tel : 323 3421 Fax : 323 0821
Email : wmcspng@hotmail.com

National Training Council Approval No: PTI 073

ADVANCED CERTIFICATE IN INFORMATION TECHNOLOGY (ACIT)

ACIT is the first stage of a systematic modular education & training programme which has been designed for enthusiastic and energetic young school leavers who wish to become Information Technology professionals and contribute to the development of the nation in the new millennium. Participants who successfully complete ACIT will be eligible to follow Diploma and Graduate programmes which will be introduced in the near future.

ACIT holders can also sit for Australian Computer Society (ACS) Examination Paper 1 and 2 which will be organised by WMCS in November this year.

Course Fee: **K 2000 + VAT**
Payable in 4 monthly installments of K 550 or 8 fortnightly installments of K 275.

ACIT is proof of significant knowledge in the field of IT, including hardware, software, networks and Internet. ACIT holders can confidently seek a career in IT related to programming, computer sales, PC based database administration or service & support. Further education will guarantee career advancement by specialising in hardware, system analysis, programming, Internet, database design, networks etc.

Target Group: Enthusiastic school leavers who love computers & technology.

Prerequisite: Grade 10 with Credits for Mathematics & English (upper pass & pass will be considered after individual interviews)

Duration: 4 months - 5 days per week - 1/2 day sessions

Assessment/Certificate: Tests are conducted for each module. Evaluation by written & practical papers. Project Documentation also to be completed. Certificate awarded on successful completion.

COURSE MODULES:

1. Fundamentals of Information Technology (FIT) Part I
2. Programming Techniques & Practice
3. Structured Turbo Pascal Language
4. Microsoft Access Programming with Visual Basic for Applications
5. Microsoft Office Applications & Programming Project Documentation
6. Fundamentals of Information Technology (FIT) Part II

Commencement: **01st May 2000**

Please reserve your seats early since only 12 students will be enrolled per batch.

CODE	COURSE NAME	BATCH NO	SCHEDULE	COMMENCEMENT	DURATION	COURSE FEE
ACIT	ADVANCED CERTIFICATE IN INFORMATION TECHNOLOGY	01	MON - FRI 9.00AM - 12.00PM	01 st MAY	04 MONTHS	K 2000.00 + TAX
CL-WIN95/98	COMPUTER LITERACY + WINDOWS 95/98	13	SAT 11.30AM - 1.30PM	15 th APR	06 WEEKS	K 350.00 + TAX
CL-WIN95/98	COMPUTER LITERACY + WINDOWS 95/98	14	TUE, THU 9.30AM - 12.00PM	11 th APR	03 WEEKS	K 350.00 + TAX
WORD97/2000	WORD PROCESSING WITH MICROSOFT WORD 97/2000	05	TUE, THU 2.00PM - 4.30PM	11 th APR	04 WEEKS	K 400.00 + TAX
EXCEL97/2000	BUSINESS PLANNING & MODELLING WITH MICROSOFT EXCEL 97/2000	06	SAT 1.30PM - 4.30PM	29 th APR	05 WEEKS	K 450.00 + TAX
EXCEL97/2000	BUSINESS PLANNING & MODELLING WITH MICROSOFT EXCEL 97/2000	08	WED, FRI 9.30AM - 12.00PM	12 th APR	04 WEEKS	K 450.00 + TAX
ACCESS97/2000	DATABASE MANAGEMENT WITH MICROSOFT ACCESS 97/2000	04	SAT 9.00AM - 11.30AM	15 th APR	05 WEEKS	K 500.00 + TAX
ACCESS97/2000	DATABASE MANAGEMENT WITH MICROSOFT ACCESS 97/2000	05	WED, FRI 2.00PM - 4.00PM	12 th APR	04 WEEKS	K 500.00 + TAX



WANTOK SPOT



LFA RIPOY

LFA bai holim pri-sisen fainel

FRANCO NEBAS i raitim

LAE Futbol Asosiesen (LFA) bai holim fainels bilong pri-sisen long dispela wiken long LFA Pak.

Kompetisen bilong pri-sisen kap i bin ran tripela wik na fainels bilong em bai kamap long Sarere na Sande.

Oi tims bai stap insait long fainels em Tolec Buresong, Blue Kumuls, HC West na Yunivesiti long divisen bilong man na long divisen bilong ol meri Blue Kumuls, Bara, Poro na Mopi.

Long resis bilong ol meri, gutpela gem bai kamap namel long Kumuls na Bara. Kumuls i bin stap namba wan long Pul A na Bara i seken long Pul B.

Dispela em namba wan taim ol meri resis long LFA Kap na bai laik traim namba wan tim long putim nem long tropi o kap.

Kumuls bai lukluk long pilaia olsem straika Nakere N. Nombe na Braint Roso husat bai lukautim midfil wantaim Grace Limbai. Dange John bai go pas long lukautim beklain bilong ol plismeri.

Roso na Limbai i gat gutpela stail long difen na atek we i bai gavim hat taim long birua tim.

Straika Nombe yet bai pinisim olgeta wok long lukim umben i guria. Tasol, ol i no ken ting Bara i bai pilai kaskas, long wanem Bara tu i gat ol pilaia we i ken bagarapim sindaun bilong arapela tim.

Bara i gat ol pilaia olsem Wantin Yagum, Helen Nesep na Edna Thomas bai go pas long ol. Dispela tripela pilaia i gat namba tu long mekim ol birua i kisim hevi long taim bilong presa futbol.

Long arapela resis bilong ol meri, Poro bai wip wantaim Mopi.

Dispela gems bai painim tupela wina long go insait long gren fainel long Sande.

Poro tim i gat ol pilaia olsem Linas Saun, Dankeo Banare na Janet Peter long lidim ol.

Na birua tim Mopi tu i gat ol meri olsem Gabi Koris, Laviana Anio, Shophie Anio na Sauga Gorgorm long go pas long ol meri. Tupela wina bilong ol dispela fainels bai pilai insait long gren fainel. Long wankain taim yet, LFA bai kikim op skul boi skoa long dispela wiken.

Vais presiden John Peka i tok, 5-pela skul i tokaut pinisa olsem ol bai resis long kompetisen bilong dispela yia. Oi skul ya em Igam, Tent Siti, Huonville, Omili na Taraka.



• Man, bilak bokis o samting! Gol kipa i flai antap na stapim bal long gem namel long Sobou na YMZ long Pot Mosbi soka resis las wiken.

PMSA kamapim nupela seleksen sistem

HENRY MORABANG i raitim

OLGETA rejista pilaia insait long Pot Mosbi Soka Asosiesen (PMSA) nau bai gat long makim Pot Mosbi long nesene soka sem-pionsip.

Dispela em wanpela nupela seleksen sistem we ol eksekutiv na klab deliget bai paitim toktok long dispela insait long wanpela spesel jenerel miting bai kamap long Sarere long Sir John Guise stedium.

Aninit long dispela sistem, ol pilaia long namba wan divisen, namba tu divisen, namba tri divisen na tu namba foa divisen

bai gat sans olsem ol pilaia long primia divisen long stap insait long Pot Mosbi tim.

Presiden bilong PMSA Kuma Aua i tok bipo ol pilaia bilong primia tim tasol i save kisim olgeta sans long makim Pot Mosbi. Tasol nau, ol pilaia long lowa divisen tu bai gat sans na dispela bai kamapim bikpela kompetisen bilong sinia o primia pilaia.

Mista Aua i laik senisim dispela sistem bikos bipo PMSA i save kisim pilaia long tripela o foapela primia klab na trening ol na salim i go pilai.

Long mekim dispela, miting long Sarere tu bai makim 5-pela

kendidet long wok selekta long lukluk raun long ol wanwan divisen long makim ol pilaia.

Mista Aua i tokaut olsem Pot Mosbi i no makim tripela o foapela klab tasol nogat, em i makim 44 klab husat i kamapim PMSA kompetisen.

Insait long dispela miting long Sarere tu, ol eksekutiv bilong PMSA tu bai pasim tok sapos kompetisen bai ran longpela taim o sotpela taim tasol. Na tu ol i laik mekim fainel disisen long larim ol klab i no afiliet i kamap memba o nogat.

De bilong baim afiliesen fi i pas long Mas 31 orait ol klab husat i no

baim fi ya mas baim hariap tru.

Presiden i tok long Mas 23, jenerel miting i pasim tok pinis olsem wanem ol klab i no baim K350 afiliesen fi bai lusim poin. Sapos ol i win, ol tim i lus bai kisim poin o sapos nogat ol bai tokaut olsem dispela em fofit ya.

Insait long arapela soka stori, Mista Aua i tok amamas long olgeta klab opisel, pilaia na sapota long statim gut 2000 sisen bikos nogat wanpela trabel i kamap.

I tru i bin gat sampela paul pasin we nem bilong planti ol tim i no bin stap long dro long wiken las wik riau bai kamap long dro long dispela wik.

Em i Gutpela Em i Tuna Em i bilong PNG stret...



- ◆ Tuna kam long solwara bilong Papua Niugini Stret.
- ◆ 100% tuna mit stret, nogat bun na nogat skin.
- ◆ Planti mit istap long olgeta tin.
- ◆ Nambawan tru long kisim protein bilong buildim masol. Em i gat Vaitamen D. na Selenium bilong helpim yu long rausim na pait long sik kensa na ol sik bilong lewa.
- ◆ Prais inap tru long yu baim.

Wantok

Digitized version made available by



Copyright: Under copyright

Rights Holder: Word Publishing Company Limited

Use: This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

Constraints: This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

Note on digitized version: Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.